

AMAWULIRO AMASA NG' OYOKAANA OWEYAGAWANDIIKIRE **Enyanjula**

Ekitabo *AMawuliro aMasa ng'oYokaana oweyagawandiikire*, kimo oku bitabo ebina ebiri omu Ndagaano eMpyaka ebisonzola oku bwomi bwa Yesu Kurisito. Buli kitabo ekimo kwebyo bakyeta bati, “Mawuliro ag’aMazima,” amakulu gaakyo “mawuliro amasa.” AMawuliro aMasa ago bagawandiikire ng'oYesu amalire okufa, era abagawandiikire babbaire Matayo, n'oMaako, n'oLuuka, n'oYokaana.

Omutume oYokaana, eyabbaire omoiza oku beegi ba Yesu niiye eyakiwandiikire, era yakiwandiikire nga wabitirowo emyanka ooti-so 90 okuzwera nakimo oku kubyala oYesu Kurisito. Newankubbaire ng'ekitabo tikikoba kiti oYokaana niiye eyakiwandiikire, iyo empandiika efaananira nakimo n'ebbaluwa eya Yokaana esooka, n'eyokubiri, n'eyokusatu. Abawandiiki abamo ab'eira babbutula bati oYokaana omu kiseera ekyo yabbaire mu kibuga Efeeso, kale kyezyeka okubba ng'ekitabo kinu bakiwandikiire mwEfeeso.

OYokaana alaga kusani ekigendererwa ky'ekitabo kinu ati kubbeera bantu kwikirirya bati oYesu niiye oKurisito ogubasukireku amafuta. Era ati niiye oMwana wa Kibumba agabira abantu abamwikirirya, obwomi obutawaawo (20:31).

Ekitabo kinu bakiwandikiire bantu bonabona aBayudaaya n'aBatali Bayudaaya. Omu ngeri egimo, kyawukana ino oku bitabo bidi ebisatu eby'aMawuliro aMasa. Mu kinu ikyo amaani agateeka ku byamagero oYesu ebiyakolere okukiraku engero. Ebintu ebindi ebikulu ng'okubatiza oYesu, n'okumukema omu kitera byona oYokaana tiyabiwandiikireku.

Engeri egibyecaanamu

1. Enyanjula 1:1-18.
2. Ebyamagero ebya buli ngeri oYesu ebiyakolere 1:19-12:50.
3. Ebyafaayo bya Yesu okutuukira nakimo oku kufaakwe n'okuzuukirakwe 13:1-20-20:31.
4. Ogumo oku mirundi oYesu egiyabonekeire abantu ng'amalire okuzuukira, era n'ekigendererwa ky'ekitabo kinu 21.

ONanzwa w'obwomi

¹ Owebabbaire nga bakaali okubbumba ekyalo, iye ogubeeta oKibono yabbairero. Iye oyo yabbairero aamo n'oKibumba era oKibono nago ali n'obwa Kibumba obwizulye. ² Era iye nago yabbairero aamo n'oKibumba okuzwera nakimo nga n'ekyalo bakaali okukibumba. ³ OKibumba yakoleserye niiye okubbumba ebintu byonabyona. Era anambula iye mpaawo kintu kadi kimo oKibumba ekiyabbumbire. ⁴ Iye oKibono nago niiye onanzwa w'obwomi, era iye kitangaala ekimolekera abantu okumanya oKibumba ekyali era ekyataka bakole. ⁵ Era oKibono nago kitangaala ekyo

ekimolekera abantu abataikirirya, neye ibo abantu abo tibamutegeire.*

⁶ Awo, ni wabbaawo omuntu, iye oKibumba oguyatumire, eriinalye bati Yokaana. ⁷ Iye yaizire okukakasa abantu amazima agakwata oku kitangaala nago, kaisi oolwo abantu bonabona baikirirye mu yooyo. ⁸ Iye oYokaana tiniye eyabbaire ekitangaala, wazira yaizire akobere abantu ebikwata kwoyo iye ekitangaala nago. ⁹ Iye oyo eyabbaire ali kwiza oku kyalo niye ekitangaala ekituuce ekimolekera buli muntu.

¹⁰ Iye oyo oKibono yabbaire oku kyalo era oKibumba yabbumbire ekyalo ng'akolesya niye. Neye oKibono oweyabbaire oku kyalo, abantu ibo tibamutegeire. ¹¹ Kale iye yaizire oku kyalokye, neye ibo abantube abananyerenyeere tibamwanirizire. ¹² Neye abo bonabona abamwanirizire ni bamwikiririyamu, yabeezyesyerye okusuuka baana ba Kibumba. ¹³ Cooka tibasuukire baana ba Kibumba mukubabyala mubutonde, mukuzwa mu lulyo lwa bazeiza baabwe, ooba mukusalawo kwa buntu waire mu kutaka kwa musaiza omufumbo, wazira oKibumba onyere niye oitewaabwe.

¹⁴ Kale oKibono oyo yasuuikire muntu, era yena n'abba oku kyalo ooti niiswe. Twamuboine omu kitiisyakye, ikyo kidi eky'oyo era iye yenkani

* **1:5** 1:5 Ooba, Tibamukaisirye okwaka okulaga ekyo oKibumba ekyali. **1:6** 1:6 Mat 3:1; Mak 1:4; Luk 3:1-2

eyazwire egiri oKibbumba oIteeye, nga iye oK-
ibono aizwire ekisa n'amazima agakwata oku
Kibbumba.

¹⁵ Cooka oYokaana yalangiriire ati, "Onu niiye
ogunatumwireku owenakobere nti, 'Oyo eyali-
iza oluzwanyuma lwange, ankiraku ekitiisya,
olwakubba yansookere okubbaawo.' "

¹⁶ Era okusinzirira oku bwizulye bw'ekisaakye,
swenaswena twabire nga tusuna ebirabo
eby'okumo kumo. ¹⁷ Ekyo kityo olwakubba
oKibbumba yawaire Musa aMateeka
okugatuleetera, kaisi ekisa n'amazima agakwata
oku Kibbumba ibyo twabisunire kubita mu
Yesu Kurisito. ¹⁸ Era mpaawo abonangaku
oKibbumba, okutoolaku oMwanawe omoiza
yenkani oYesu, iye oyo aali aamo n'oKibbumba
omu kitiisyaakye, era oMwanawe oyo nago niiye
eyatumanyikisirye oKibbumba ekyali.

*Obukwenda bwa Yokaana oMubatizi
(Mat 3:1-12; Mak 1:1-8; Luk 3:1-18)*

¹⁹ Kale awo abeekubbemberi b'aBayudaaya
ab'omu kibuga ky'e Yerusaalemi ni batuma
abamo oku bakabona n'aBaleevi okubuulya
oYokaana oMubatizi bati, "Niiwe onaani?" ²⁰ Iye
tiyeebisabisire, wazira yabbutwire n'eidembe
ati, "Tinize oKurisito ogubasukireku amafuta."

²¹ Awo niiwo ibo okumubuulya bati, "Aale
atyanu niiwe onaani? Niiwe Eriya?"

Iye oYokaana n'abairamu ati, "Bbe tinize
Eriya."

Tete ni bamubuulya bati, “Niiwe onaabbi oodi ogubatusuubizire?”

Iye n’abairamu ati, “Bbe.”

²² Awo ekisembayo tete ni bamubuulya bati, “Abatutumire twabakoba tuti niiwe onaani? Weeyeta otya?”

²³ Kale awo oYokaana n’abairamu ng’ajulira Kiwandiike ekiri omwIsaaya ekiti, “Ninze oyo atumulira omu kitera n’eigono eryaminkirira nti, ‘Mutereerye oluguudo lwa Musengwa oYesu.’”

²⁴ Awo oolwo aBafalisaayo abo abebatumire ²⁵ niiwo okubuulya oYokaana bati, “Kale lwaki obatiza obanga tiniwe oKurisito ogubasukireku amafuta, era nga tiniwe Eriya waire onaabbi oodi ogubatusuubizire?”

²⁶ Era oYokaana n’abairamu ati, “Nze mbatiza n’amaizi, neye waliwo iye abeemereiremu aanu ogumutategeera. ²⁷ Niiye oyo eyaliiza oluzwanyuma lwange, nze oguntasaanira okusi-bindula obusibiro bw’engaitogye.”

²⁸ Ebyo byonabyona byabbairewo mu Bbesaniya, oku lubba ludi olundi olwa mwiga oYoludaani eeyo oYokaana egiyabbaire abatizira.

Iye atoolawo ekibbikibbi

²⁹ Awo oku lunaku olwairireku, oYokaana n’abona oYesu ng’asimba egyali, kaisi oYokaana n’akoba ati, “Aale mubone oyo aali ooti Ntaama oMutomuto owa Kibbumba, iye oYesu, oKibbumba oguyalondere okuwaayo ng’esadaaka okutoolawo ebikole ebibbibibi

eby'ekyalo. ³⁰ Niiye oyo ogunatumwireku nti, 'Waliwo omuntu eyaliiza oluzwanyuma lwange, iye ankiraku obwezye olwakubba iye yansookere okubona eisana.' ³¹ Era nze zena nabbaire timmutegeire nti niiye, neye ekyagirire ni njaba ng'ambatiza n'amaizi, kyabbaire nti, Iye amanyikane ati niiye omulonde omu bantu b'e Isirairi."

³² Awo oYokaana n'akakasa kusani ino ati, "Naboine oMwoyo oMweru ng'amwikaku okuzwa omwigulu, ng'ali ooti njiiwa, era n'amusigalaku. ³³ Nze tinankubbaire mmumanya, neye oKibbumba eyantumire okubatiza n'amaizi, niiye eyankobere ati, 'Oguwalibona ng'oMwoyo amwikaku era n'amusigalaku, yalibba niiye oyo eyalibatiza n'oMwoyo oMweru.' ³⁴ Era ikyo nakiboine, era mbakakasa nti oyo niiye oMwana wa Kibbumba."

Abeegi ba Yesu abasookere

³⁵ Oku lunaku olwairireku, oYokaana tete yabbaire omu kifo ekinyere kidi ng'ayemereire aamo n'ababiri oku beegibe. ³⁶ Awo n'abona oYesu ng'abita, oYokaana n'akoba abeegibe ati, "Aale mubone oyo aali ooti Ntaama oMutomuto, iye oYesu, oKibbumba oguyalondere okuwaayo!"

³⁷ Awo abeegi ba Yokaana ababiri nago owe-bawuliire ng'oYokaana atumula ebibono ebyo, ni basimbuka ni basengererya oYesu. ³⁸ Kale awo oYesu oweyacuukire okulola e nyuma n'abona ng'abantu abo nago ababiri bamusengererya, n'ababuulya ati, "Munoonia niki?" Ibo ni

bamwiramu bati, “Laabbi ogona yaina?” (Eki-ibono “Laabbi,” ky’olutumu oLwebbulaniya, amakulu gati Musomesya).

³⁹ Awo oYesu n’abairamu ati, “Mwize twabe mumanyiceeyo.” Awo ni baaba ni bamanyica oYesu egyagona. Owebaabiireyo gyabbaire ooti saawa ikumi egy’eigolo era basiibire naye olunaku oolwo.

⁴⁰ Era omoiza kwabo abawuliire oYokaana ng’atumula oku Yesu, era nago abasengereirye oYesu, yabbaire Andereya, omuganda wa Simooni oPeetero.

⁴¹ Era iye Andereya ekintu ekiyasookere okukola kwabbaire kunoonia mugandawe oSimooni n’amukoba ati, “Tuboine oMasiya.” Amakulu gati oKurisito ogubasukireku amafuta. ⁴² Era awo Andereya n’atwala oSimooni egiri oYesu. Cooka oYesu n’alingirira oSimooni kaisi n’amukoba ati, “Niiwe oSimooni omutaane wa Yokaana. Era bakwetanga bati Keefa.†” nga litegeeza Peetero.

OYesu akoba oFiripo n’oNasanairi okumusengererya

⁴³ Oku lunaku olwairireku, oYesu n’asalawo okusimbuka okwaba omwitwale ly’e Galiraaya. Kale eeyo n’ayajiriryayo oFiripo, era oYesu n’amukoba ati, “Oize obbe mwegi wange.”

⁴⁴ OFiripo yena yabbaire azwera mu kibuga ky’e Bbesusaida, Andereya n’oPeetero egibabbaire bazwera.

⁴⁵ Kale oFiripo n’anoonia oNasanairi era n’amubona, kaisi n’amukoba ati, “Tuboine

1:40 1:40 Yok 1:37 † **1:42** 1:42 Keefa,liri mu Lwebbulaniya, omu Luyonaani bati Peetero, nga gategeeza Ibbaale.

omuntu oodi oMusa oguyatumwireku omu Kitabo ky'aMateeka, era n'abanaabbi bona ogubatumwireku omu Biwandiike. Era oyo nago niye oYesu omutaane wa Yusufu ow'omu kibuga ky'e Naazaleesi."

⁴⁶ Awo oNasanairi n'amubuulya ati, "Naazaleesi! Eeyo yona eyezya okuzwakuuyo akasa konakona?" OFiripo n'amwiramu ati, "Ala oize obone."

⁴⁷ Iye oYesu oweyaboine oNasanairi nga yatira okumutuukaku, oYesu n'amutumulaku ati, "Obone oMwisirairi onanyerenyeere, onambulamu bubbeyi naire."

⁴⁸ Awo iye oNasanairi n'amubuulya ati, "Omanyiciryeye otya?" OYesu n'amwiramu ati, "Nkuboine ng'okaali oli mu musaale omutiini, nga n'oFiripo akaali n'okukweta."

⁴⁹ Kale awo oNasanairi n'akoba ati, "Musesesya, niwe oMwana wa Kibbumba, era niwe oKabaka wa Isirairi!"

⁵⁰ Iye oYesu n'amukoba ati, "Oikirirya olwakubba nkukobere nti nkuboine ng'okaali oli mu musaale omutiini? Walibona n'ebikiraku ebyo." ⁵¹ Era oYesu n'ayongeraku okumukoba ati, "Mazima dala mbakobera nti mwalibona eigulu nga lyeigwire, n'abamalaika ba Kibbumba nga baniina omwigulu era nga baika oku Mwana wa Muntu."

2

Embaga y'obugole e Kaana

¹ Awo oluzwanyuma lw'enaku ibiri, oku lwokusatu, ni wabbaawo embaga ey'obugole omu kibuga e Kaana eky'omwitwale ly'e Galiraaya. Omaaye wa Yesu yabbaireyo oku mbaga eyo, ² era oYesu n'abeegibe bona babbaire beete oku mbaga nago, era bona babbaireyo. ³ Kale awo omwenge ogw'emizabbibbu owegwawoirewo, omaaye wa Yesu n'amukoba ati, "Tibakaali bali n'omwenge gw'emizabbibbu."

⁴ Neye oYesu n'amukoba ati, "Mama, lwaki onnyingirya omu bintu ebyo? Nze ekiseera ekyange kikaali kutuuka." ⁵ Neye omaaye n'akoba abaweererya b'okumbaga ati, "Buli ekiyabakoba nga inywe mukikola."

⁶ Kale oku mbaga aawo wabbairewo agansaka aganene mukaaga agebabaizire omu mabbaale. Agansaka ago nago babbaire bagateekerewo lw'omukolo ogw'aBayudaaya ogw'okwetukulya, buli gunsaka ogumo nga gw'elita 80 ku 120. ⁷ Oluzwanyuma oYesu n'akoba abaweererya abo nago ati, "Agansaka ago mugaizulye amaizi;" era bona ni bagaizulirya nakimo paka ku migo. ⁸ Awo n'abakoba ati, "Aale atyanu museneku mutwalire oyo akulira embaga."

Kale abaweererya bona ni bakola ekyo oYesu ekiyabakobere, ⁹ era akulira embaga n'alegaku amaizi oYesu ageyabbaire asuuciryemu omwenge ogw'emizabbibbu. Cooka tiyamanyiciryegigwabbairerere guzwire waire ng'abaweererya abasenere amaizi ago ibo babbaire bamaite. Kale awo akulira embaga n'airya omugole omusaiza oku mbale okumukoba ati, ¹⁰ "Buli muntu asooka kugabula

mwenge omusa, atyanu abageni owebamala okunywa ni banoja, kaisi n'aleeta ogutali musa. Neye iwe obisire omwenge omusa paka saawa eenu.”

¹¹ Kanu niiko akamanyiciryo k'ekywunyo akasooka oYesu akeyakolere omu kibuga e Kaana eky'omwitwale ly'e Galiraaya, era omu ngeri eyo yalagire ekitiisyakye, era abeegibe ni bongera okumwikiririyamu.

¹² Ekiseera owekyabitirewo ng'embaga ewoire, oYesu n'abagandabe n'abeegibe, era n'omaaye, ni baserengeta ni baaba omu kibuga e Kaperenawumu eeyo egibamalire enaku ntono giti.

OYesu abbinga abatundira omu Yeekaalu

(Mat 21:12-13; Mak 11:15-17; Luk 19:45-46)

¹³ Awo oMukolo ogw'aBayudaaya ogw'oKutambukirya owegwabbaire gwatira okutuuka, oYesu n'abeegibe ni baniinaniina ni baaba omu kibuga e Yerusaalemi. ¹⁴ Cooka omu luuga lw'eYeekaalu yaajiriryemu abantu nga batundiramu ente n'entaama n'enjiwa egy'okusadaaka, era n'abandi nga batyaime bawaanyisya empiiya. ¹⁵ Kale awo oYesu n'akwata emiguwa, n'agikambamu ofaalu, era awo n'abbingamu bonabona bazwe omu luuga lw'eYeekaalu, era n'abbingamu n'entaama n'ente. Era n'agangulyaga amamenza agebabbairi bawaanyisiryaku empiiya, era empiiya ni gisusukiaga. ¹⁶ Awo n'akoba ababbairi batundiramu enjiwa ati,

“Enjiiwa ginu mugitoole aanu. Mubba mutya okusuuca enyumba ya Bbaabba okubba katale!”

¹⁷ Awo abeegi ba Yesu ni beewukirya bati bakiwandiikire bati, “Okutaka eino enyumbayo, Musengwa Kibbumba, kwalimmalisyawo.”

¹⁸ Kale awo abeekubbemberi ba Bayudaaya ababbairero ni bamukoba bati, “Kamanyiciryo k’ekyewunyoki akooyezya okukola okutulaga oti oli n’obweze okukola ebyo byonabyona?” ¹⁹ Iye oYesu n’abairamu ati, “Aale muvunewo eYe-ekaalu eenu, nze nagyombeka omu naku isatu.”

²⁰ Awo abeekubbemberi ba Bayudaaya ni bakoba bati, “Tumalire emyanka 46 nga twombeka eYeekaalu eyo, kaisi iwe wagyombeka otya omu naku eisatu?”

²¹ Neye eYeekaalu oYesu egiyabbaire atumulaku, niigwo omubirigwe. ²² Era oweyamalire okuzuukira, kaisi abeegibe ni beewukirya bati yakitumwire, ni baikirirya eBiwandiike, era n’ebibono oYesu ebiyabbaire atumwire.

OYesu amaite emyoyo gy’abantu bonabona

²³ Awo oYesu oweyabbaire ng’akaali ali e Yerusalemi oku Mukolo ogw’oKutambukirya, abantu bangi ni babona obumanyiciryo obw’ebywunyo oYesu obuyakolere ni bamwikiririyamu.

²⁴ Neye oYesu iye tiyabeesigire, olwakubba yabbaire amaite emyoyo gy’abantu bonabona.

²⁵ Yabbaire tiyeetaagisya muntu niiye n’abba amukobera ebintu omuntu ebyaseega, olwakubba iye onyere

2:17 2:17 Zab 69:9
15:29

2:19 2:19 Mat 26:61; 27:40; Mak 14:58;

yabbaire amaite ebiri omu mwoyo gwa buli muntu.

3

OYesu n'oNikodemu

¹ Wabbairewo omusaiza, eriinalye bati Nikodemu, era yabbaire mukwenda oku lukiiko lw'aBayudaaya olukulu. Omusaiza oyo yabbaire wa mu kibbula kya Bafalisaayo.

² Kale omusaiza oyo n'ayaba obwire egiri oYesu, era n'amukoba ati, "Musomesya, iswe tumaite tuti oli musomesya oKibbumba oguyatumire. Ekyo kityo olwakubba mpaawo ayezya okukola obumanyiciryo obw'ebyewunyo iwe owookola, okutoolaku ng'oKibbumba ali naye."

³ Iye oYesu n'amwiramumu ati, "Mbakobera amazima nti omuntu owebatamubyala omulundi gwokubiri, tiwakwingira omu bwakabaka bwa Kibbumba."

⁴ Awo oNikodemu n'amubuulya ati, "Omuntu akulire beezya batya okwiramumu okumubyala tete? Mazima tayezya okukanga omu kida kya maaye, kaisi tete ni bamubyala omulundi ogwokubiri."

⁵ Iye oYesu n'amwiramumu ati, "Nkukobera amazima nti omuntu owebatamubatiza n'amaizi era n'asuna n'oMwoyo oMweru, tiwakwingira omu bwakabaka bwa Kibbumba.

⁶ Iye omuntu abyala muntu, era n'omuntu asuna oMwoyo oMweru asuuka muyaaka omu bwomibwe obw'omwoyo. ⁷ Tiweewunya olwakubba nkukobeire nti omuntu bateekwa

okumubyala omulundi ogwokubiri. ⁸ Iye ompunga owaafuwa, egyataka gyalungama. Cooka owulira kuwuma kwonkani, neye tomanyica egyazwa n'egyayaba. Kale n'omu ngeri enanyere eyo tikyezyeka okukimanya engeri omuntu egibamubyala omu bwomibwe obwa mwoyo."

⁹ Awo oNikodemu n'amubuulya ati, "Ebyo byezya bitya okubbaawo?" ¹⁰ OYesu n'amwiramu ati, "Iwe omukugu omu by'ediini aanu omwIsirairi, obba otya okubba nga totegeera ebintu ebyo? ¹¹ Nkukobera amazima nti iswe tutumula ku bintu ebitumaite, era tubakobera ku bintu ebitwaboineku, neye era inywe timwikirirya ebitubakobera. ¹² Kaisi obanga owembakobeire ebintu ebibakola oku kyalo timwikiriirye, kaisi leero owenabakobera ebibakola omwigulu mwabiikirirya mutya? ¹³ Mpaawo kwinywe eyabbaire aniinireku omwigulu, wazira iye oMwana wa Muntu oyo iye eyazwereireyo."

¹⁴ Era ng'oMusa oweyaanikire ekibbumbwe kya mpiri oku kisaale omu kitera, n'omu ngeri enanyere eyo n'oMwana wa Muntu atyo we-bateekwa okumwanika oku musalabba, ¹⁵ kaisi kyezye okubba nti buli muntu amwikiririyamu asune obwomi obutawaawo. ¹⁶ Ekyo kityo olwakubba oKibbumba yatakire ino abantu era n'awaayo oMwanawe omoiza yenkani, kaisi buli muntu amwikiririyamu tiyajigirika, wazira abbe n'obwomi obutawaawo. ¹⁷ Ekyo kityo

olwakubba oKibbumba tiyatumire oMwanawe oku kyalo kusalira bantu musango, wazira yamutumire, kaisi abantu balokoke nga babita mu niye.

¹⁸ Buli aikiririrya omu Mwana wa Kibbumba tigumusinga, neye oyo atamwikiririyamu gubba gumalire okumusinga, olwakubba taikiririrya omu Mwana oyo omoiza yenkani owa Kibbumba. ¹⁹ Era gunu niigwo omusango. Iye oyo ekitangaala yaizire omu bantu, neye ibo ni bataka kukolanga bikole ebibbibbi eby'endikiirya okukiraku ebisa eby'ekitangaala. ²⁰ Ekyo kityo olwakubba buli muntu akola ekikole ekibbikibbi, acaawa oyo ekitangaala, era taiza egyali olw'okutya ati bademba ni babonekesya ebikolebye ebitali bisa. ²¹ Neye buli muntu akolera oku mazima ga Kibbumba, ayaba egyali oodi iye ekitangaala, kaisi oolwo kibbe aweeru kusani kiti, ekikole ekyo ekisa ekyabba akolere, asinziriire mu maani ga Kibbumba.

OYokaana oMubatizi atumula oku Yesu

²² Ebyo owebyawoire, oluzwanyuma lw'enaku ntono oYesu n'abeegibe ni baaba omu kitundu eky'e Buyudaaya, n'abba eeyo nabo, era n'abatiza abantu. ²³ Era oYokaana yena yabbaire ng'ali kubatizanga omu mwiga Anoni, okumpi n'ekibuga e Saalimu olwakubba eeyo amaizi gabbaireyo mangi, era n'abantu ni beeyongeranga okwabayo okubabatiza. ²⁴ Ebyo byabbairewo ng'oKerode akaali okwigalira oYokaana omu mabbuusu.

²⁵ Atyanu, abamo oku beegi ba Yokaana ni babba n'enkayaana n'abamo oku Bayudaaya, oku bikwata oku bulombolombo obw'okwetukulya. ²⁶ Kale awo ni baaba eeri oYokaana ni bamukoba bati, "Musomesya, oyewukirya omusaiza oodi oguwabbaire naye era oguwatuwaireku obujulizi owewabbaire ng'oli kubatiza abantu oku lubba ludi olwa mwiga oYoludaani? Omusaiza oyo aali kubatizanga, era abantu abakira obungi baaba giri niiye."

²⁷ Awo oYokaana n'abairamu ati, "Omuntu tayezya okusuna obwezye bwonabwona ng'oKibbumba tiniye amuwaire. ²⁸ Inywe abananyere mwezya okuwa obukakafu muti nakobere nti, 'Tininze oKurisito ogubasukireku amafuta, neye nze oKibbumba yantumire kukobera bantu ebikwata kwoyo ng'akaali okwiza.' ²⁹ Kityo n'omugole abba w'oyo amuleetere. Era omukaagwa w'oyo aleetere omugole iye abbaawo kubbeera oyo aleetere, amubba kumpi n'amuwulisisya, era asangaala ino owaawulira eigono ly'oyo aleetere omugole. Era n'omu ngeri enanyere eyo zena eisangaalo lyanze libba mu bwizulye owempulira nti abantu baaba egiri oYesu. ³⁰ N'olwekyo iye oYesu ateekwa okweyongera okufuma, neenu nga nze niiye wenkendeera omu kufuma."

Iye oyo akira bonabona

[³¹ Awo oYokaana n'ayongera okubakoba ati, "Oyo oMulonde azwa omwigulu niiye akira

bonabona. Cooka abo ababyale b'oku kyalo kunu babba bantu-buntu, era batumula biibyo ebikwata oku kyalo. Neye oyo azwa omwigulu niye akira bonabona. ³² Era iye nago akobera abantu ku biyaboineku n'ebiyawuliireku ng'ali egiri oKibbumba, neye mpaawo aikirirya ati ebyatumula bituuce. ³³ Wazira omuntu aikirirya ekibonokye, abba bukakafu obulaga buti oKibbumba ekyakoba kituuce. ³⁴ Ekyo kityo olwakubba oodi nago oKibbumba oguyatumire, atumula bibono ebyo ebyasuna okuzwa eeri oKibbumba olwakubba oKibbumba amuwa oMwoyowe omu bwizulye. ³⁵ OKibbumba era olteeye ataka oMwanawe, era yawaire oMwanawe obwezye oku bintu byonabyona. ³⁶ Kale buli muntu aikiririrya omu Mwana wa Kibbumba, abba n'obwomi obutawaawo. Neye atamwikiririyamu, tabba nabwo, wazira oKibbumba yeeyongerera kusunguwala olwa muntu oyo].”*

4

OYesu atumula n'omukali oMusamaaliya

¹ Omu kiseera ekyo aBafalisaayo bawuliire bati oYesu ali kusunanga era ng'ali kubatizanga abasengereri bangi okukiraku oYokaana. ² Waire nga babbaire bakiwuliire batyo, ekituuce kiri nti oYesu iye onyere tiniye eyabatizanga, neye abeegibe. ³ Kale oYesu oMusengwa oweyategeire

3:35 3:35 Mat 11:27; Luk 10:22 * **3:36** 3:31-36 Abakugu omu by'eBbaibbuli bakoba bati ebiri omu nyiriri ginu tibyabbaire bya Yokaana wazira bya bawandiiki.

ebintu ebyo abantu ebibabbaire bamutumulaku, n'azwa omwitwale ery'e Buyudaaya, n'akanga omwitwale ery'e Galiraaya. ⁴ Era yabbaire ng'ali n'okubita omwitwale ly'e Samaaliya.

⁵ Kale awo n'atuuka omu kibuga eky'omu Samaaliya ekibeeta Sikali, ekiri okumpi n'omuwuluko eira oYaakobbo oguyawaire omutaanewe oYusufu. ⁶ Omu muwuluko ogwo mwabbairemu eiruba oYaakobbo eriyabbaire akwire. Cooka oYesu yabbaire adembere olw'olugendo, kale n'atyamaku okwiruba eeryo okuwumulaku oku saawa ooti mukaaga egy'omusana.

⁷ Awo ni wabbaawo omukali oMusamaaliya eyaabire okwiruba nago okusena amaizi, kaisi oYesu n'amukoba ati, "Ompeeku amaizi nnyweku." ⁸ Omu kiseera ekyo abeegi ba Yesu babbaire baabire mu kibuga Sikali kugula kyokulya.

⁹ Awo iye omukali oMusamaaliya n'amwiramumu ati, "Iwe oli Muyudaaya aate nze ndi mukali Musamaaliya. Oyezya otya okunsaba amaizi okunywa?" Omukali oyo yakobere atyo olwakubba aBayudaaya babbaire nga tibakolagana n'aBasamaaliya.

¹⁰ Awo oYesu n'amwiramumu ati, "Singa obbaire omaite ekirabo oKibbumba ekyataka okukuwa, era singa omaite akusaba amaizi okunywa, wandibbaire omusabire amaizi agaleeta obwomi, era yandigakuwaire."

¹¹ Tete omukali n'amukoba ati, "Sebo, obula ekiwasenesya, aate eiruba lyabiriri. Watoola

yaina amaizi nago ag'obwomi? ¹² Ekyotegeeza iwe okira ozeiza waiswe oYaakobbo iye eyatuwaire eiruba linu, iye n'abaanabe eryebanywangamu era n'ebyayobye?"

¹³ Awo oYesu tete n'amwiramumu ati, "Buli muntu anywa amaizi ganu, enyonta yaliiramumu okumuluma. ¹⁴ Neye buli anywa amaizi gadi ageemuwa, enyonta tiyaliiramumu okumuluma emirembe n'emirembe. Era amazima aganyere, amaizi ago agempa omuntu oyo, mwiye galisuuka nsulo eyalimuwa obwomi obutawaawo."

¹⁵ Tete era omukali nago n'amukoba ati, "Sebo, ompeeku amaizi ago nago kaisi enyonta tiyandumanga, era mpezye okutaizanga aanu okwiruba tete okusena amaizi."

¹⁶ Iye awo oYesu n'amukoba ati, "Oyabe oyete oibaawo, oire naye aanu." ¹⁷ Iye omukali n'amwiramumu ati, "Mbula oibange." Awo oYesu n'amukoba ati, "Oli mutuuce okukoba oti obula oibaawo. ¹⁸ Dala ekyo ekyokobere kituuce olwakubba wankafumbirwaku abasaiza bataanu, era omusaiza ogwolinaye omu kiseera kinu tiniye oibaawo. Era ekyo ekiwankazwa okutumula kituuce."

¹⁹ Awo omukali n'akoba oYesu ati, "Sebo, ombonekera ooti oli naabbi. ²⁰ Aale obone kinu; iswe aBasamaaliya, abazeiza baiswe basinziranga oKibbumba ku lusozi lunu oGerizimu. Neye inywe aBayudaaya mukoba muti eYeekaalu ey'omu Yerusalemi niikyo ekifo omututeekwa okusinziranga oKibbumba."

²¹ Awo iye oYesu n'amukoba ati, "Mukali iwe, oikirirye ebyenkoba nti ekiseera kiiza, ekimwal-

ibbanga timukaali musinzira oItewaiswe oKibbumba ku lusozi lunu waire mu Yerusaaemi. ²² Aale inywe aBasamaaliya timumaite oKibbumba ogumusinza. Neye iswe aBayudaaya tumaite oKibbumba ogutusinza, olwakubba oKibbumba akolesya Bayudaaya okulokola abantu. ²³ Neye era ekiseera kiiza, era kituukire, abantu abasinza omu butuuce atyanu ekibasinzirangamu oKibbumba oItewaiswe mu mwoyo era mu butuuce. Ekyo kityo olwakubba ibo abasinza batyo niibo oItewaiswe oKibbumba abanoonia. ²⁴ Iye oKibbumba mwoyo mwereere, kale abo abamusinza bateekwa okumusinzanga mu mwoyo era mu mazima.”

²⁵ Era awo omukali n’amukoba ati, “Mmaite nti oMasiya aiza. Era iye oweyaliiza yalitusonzolera ebintu byonabyona.”

²⁶ Kale awo oYesu n’amukoba ati, “Nze atumula na iwe ninze oyo nago ogwotumulaku.”

Abeegi bakanga egiri oYesu

²⁷ Omu kiseera ekinyere ekyo abeegi ba Yesu ni bakanga egiri oYesu, cooka ni beewunya okwajirya oYesu ng’atumula n’omukali. Neye ni watabbaawo kwibo eyabwirye omukali ati, “Otaka niki?” Ooba abuulya oYesu ati, “Lwaki otumula naye?”

²⁸ Kale awo omukali oyo n’aleka awo en-sakaye ey’amaizi, n’akanga omu kibuga e Sikali n’akoba abantu ababbaireyo ati, ²⁹ “Mwize mubone omusaiza andagwireku byonabyona nenca ebinkolanga. Onu ayezya okubba niye oKurisito ogubasukireku amafuta?” ³⁰ Awo

abantu ni bazwa omu kibuga ekyo nago, ni baweera eeyo okumweboneraku.

³¹ Omu kiseera ekyo omukali ekiyakobeiremu abantu, abeegi babbaire mu kwegairira Yesu bati, “Musomesya, obbeeku n’akoolya.” ³² Neye iye n’abairamu ati, “Nze ndi n’ekyokulya inywe ekimutamaiteku kadi.”

³³ Awo abeegibe ni beebuulyangana bati, “Weezya okubba waliwo amuleeteireku ekyokulya?”

³⁴ Neye iye oYesu n’akobera abeegibe ati, “Owenkola ebyo eyantumire ebyataka nkole, mba mwikuti ooti-so ndiire kyokulya. ³⁵ Aale timuli n’entumula ekoba eti, ‘Wasigaireyo emyeri eena, kaisi amakungula gatuuke?’ Neye nze mbakoba nti mulole eedi oku misiri mubone amakungula gatuukire!

³⁶ “Era n’omu kiseera kinu omukunguli asuna empeeraye, era n’amakungula niibo abantu abebaingirya omu bwomi obutawaawo. Ekyo kityo olw’okuzweramu omusigi n’omukunguli basune eisangaalo ery’aamo. ³⁷ Era omu ngeri eyo entumula eenu ntuuce ekoba eti, ‘Ogondi asiga, era ogondi n’akungula.’ ³⁸ Aale nabatumire okwaba okukungula ekinandi muteganira. Ibo bantu bandi niibo abakalabanire n’amaani kaisi niinywe ni mubba musunamu emigaso mwebyo abandi ebibakalabanire.”

ABasamaaliya bangi ni baikirirya

³⁹ Awo abantu bangi ab’omu kibuga ky’e Samaaliya ekyo, ni baikiririrya omu oYesu olw’ebibono omukali oyo ebiyabakobeire ati, “Andagwireku byonabyona nenca ebinkolanga.”

40 N'olwekyo abantu b'omu Samaaliya owebatuukire oYesu egiyabbaire, ni bamwegairira abbeeku eeyo nabo, kale oYesu n'amalayo enaku ibiri.

41 Era olw'ebibono oYesu ebiyatumwire byazwereireku abantu abandi bangi ab'omu Samaaliya okumwikiririyamu. 42 Era ni bakoba omukali oyo nago bati, "Aale atyanu titwikiririrya omu Yesu lw'ebibonoby ebyotukobeire, neye olwakubba iswe abanyere twewuliriireku, era atyanu tumaite tuti omusaiza onu dala niye oMulokoli w'abantu b'oku kyalo."

OYesu alamy omwana w'omukungu

43 Oluzwanyuma lw'enaku eibiri, oYesu n'azwa omu kibuga e Sikali, n'akanga omwitwale ery'e Galiraaya. 44 Cooka oYesu onyere yabbaire akitumwireku ati, "Onaabbi tibamuwa ekitiisya omu kyalo ky'e waabwe."

45 Wazira oweyatuukire e Galiraaya, abantu baayo ni bamusangaalira. Ibo bakolere batyo olwakubba bona babbaire baboineku byonabyona ebiyabbaire akolere e Yerusaalemi, oku Mukolo ogw'oKutambukirya, olwakubba bona babbaireyo oku Mukolo ogwo.

46 Awo oYesu n'akanga omu kibuga e Kaana eky'omwitwale ery'e Galiraaya, enyumaku egiyasuuciirye amaizi ni gabba mwenge gw'emizabbibbu. Cooka eeyo wabbairero omukungu wa kabaka eyabbaire omutyami w'omu kibuga ky'e Kaperenawumu eyabbaire

n'omutaanewe omulwaire. ⁴⁷ Omusaiza oyo oweyawuliire ati oYesu azwire omwitwale ly'e Buyudaaya atuukire omu Galiraaya, n'ayaba egiyabbaire n'amwegairira aserengeteku e Kaperenawumu, alamy'e omutaanewe eyabbaire yatira okufa.

⁴⁸ Awo oYesu n'amukoba ati, "Owemutabone nga nkola obumanyiciryo obw'ebyewunyo era n'ebyewunyisya timwaikirirye."

⁴⁹ Neye omukungu n'amwiramu ati, "Sebo, nkwegairiire tuserengeteku e wange ng'omwana wange akaali okufa."

⁵⁰ Iye oYesu n'amukoba ati, "Okange e ika, omutaanewo ayaba okulama." Kale omusaiza oyo n'aikirirya ebibono oYesu ebiyamukobere, era n'asimbuka okukanga e ika. ⁵¹ Oweyabbaire ng'ali omu nzira, abagalamabe ni bamusangaana, ni bamukobera bati, "Omutaanewo alamire." ⁵² Kaise iye oweyababwirye esaawa egiyaisuukiiremu, ni bamukoba bati, "Omusuuja gwalamire izo ku saawa musanvu." ⁵³ Awo oiteeye w'omwana n'ayewukirya ng'eeyo niiyo esaawa enanyerenyeere oYesu egiyamukobereiremu ati, "Omutaanewo ayaba okulama." Awo omusaiza oyo aamo n'ab'omu kisitokye bonabona, ni baikiririrya omu Yesu.

⁵⁴ Era ako niiko akamanyiciryo k'ekyewunyo akokubiri oYesu ekiyakolere oweyazwire e Buyudaaya n'akanga e Galiraaya.

5

OYesu alamyā omulwaire oku kidiba

¹ Awo ekiseera owekyabitirekuuwo, oYesu n'aniinaniina e Yerusaalemi oku mukolo gw'aBayudaaya. ² Omu Yerusaalemi, okumpi n'ogumo oku miryango egyaingirangamu ogubeeta oMulyango gw'entaama,* wabbairewo ekidiba ky'amaizi. Ekidiba ekyo nago omu Lwebbulaniya ekibeeta Bbetizata,† kyabbaireku ebisiisira bitaanu nga bikyeruguulirirye. ³ Omu bisiisira ebyo, mwalambaalangamu abalwaire bangi ino, n'aboofu, n'abaleme, n'abasanyalaire era [ni bakuumiriranga amaizi okwekuyugamu. ⁴ Omalaika yaikanga omu kidiba omu biseera ebimo, n'akuyugamu amaizi. Oyo eyesookanga okwika omu kidiba nga bamalire okukuyugamu amaizi, yalamanga buli bulwaire bwonabwona obuyaabbanga nabwo.]‡

⁵ Kale awo oku kidiba wabbairewo omusaiza, ng'amalire emyanka 38 nga mulwaire.

⁶ OYesu oweyaboine omusaiza oyo ng'alambaire awo, era n'amanya ati yabbairere atyo okumala ekiseera kinene, n'amukoba ati, "Otake okulama?"

⁷ Omulwaire n'amwiramamu ati, "Sebo, nze ndambaku omuntu ambeera okugwa omu kidiba omu kiseera ekyo owebakuyugiramamu amaizi.

* **5:2** 5:2 Omulyango gw'entaama, niimwo omu babityanga entaama nga baaba okugisadaaka. † **5:2** 5:2 Bbetizata, lizwa mu liina bati, Bbesuzasa, ooba Bbesesida, ooba Bbesesuda, ooba Bbesusaida. ‡ **5:4** 5:4 EBiwandiike ebimo ebyeira bibulamu ebibono ebiri omu bukita.

Mba-so nkaali ngalagatana okugwamu, ogondi n'ansookamu."

⁸ Awo oYesu n'amukoba ati, "Osetuke, weetiike omukeekagwo, era otambule oyabe." ⁹ Era omusaiza oyo n'alamirawo, n'aginga omukeekagwe, n'atambula n'ayaba.

Olunaku oolwo lwabbaire ku Saabbaato. ¹⁰ Kale aBayudaaya ni bakoba omusaiza oYesu oguyalamirye bati, "Olwatyano Saabbaato, era amateeka tigakwikirirya okwetiika omukeekagwo."

¹¹ Neye iye n'abairamu ati, "Omusaiza andamirye, niye ankobere ati, 'Weetiike omukeekagwo, era otambule oyabe.' "

¹² Kale awo ni bamubuulya bati, "Musaizaki oyo akukobere okwetiika omukeekagwo, era ati otambule oyabe?" ¹³ Cooka omusaiza oYesu oguyalamirye yabbaire tamaite amulamirye olwakubba n'oYesu yabbaire agoteire omu kiziima ky'abantu ekyabbaire awo.

¹⁴ Oluzwanyumaku, oYesu yaajiirye omusaiza nago omu Yeekaalu, era n'amukoba ati, "Aale obone, ngoyo tete oli kusani. Aale toirangayo okukola ekibbikibbi, neye owewaliirayo ekigosi ekikiraku kidi kyezya okukubbaaku."

¹⁵ Awo omusaiza nago n'ayaba n'akobera aBayudaaya ati oYesu niye eyabbaire amulamirye.

¹⁶ Kale awo, abeekubbemberi ba Bayudaaya ni batandiika okuyiiga oYesu okumwita iye olw'okulamy omuntu oku Saabbaato, ikyo ekyabbaire ekivuna amateeka g'eSaabbaato.

17 Neye iye oYesu n'abairamu ati, "Obanga oBbaabba iye akola buliijo paka lwatyanu, kaisi nze?"

18 Ikyo ekyo kyongairemu Bayudaaya abo maani okugezyaku okumwita. Ekyo kyabbaire kityo olwakubba nti, oYesu tiyabbaire avunire mateeka g'eSaabbaato kyonkani, neye era ng'akoba ati oKibbumba niiye oIteeye onanyerenyeere. Kale mwekyo n'abba yeesuca okubba yenkanankana n'oKibbumba.

Obwezye bw'oMwana wa Kibbumba

19 Awo oYesu n'abasonzolera ati, "Mbakobera amazima nti oMwana mpaawo ekyayezya okukola okululwe, wazira ekyo ekyabona ng'oIteeye akola. Era iye oIteeye ekyakola, niikyo oMwanawe yena ekyakola. 20 Ekyo kityo olwakubba oIteeye w'oMwana oyo, amutaka era amulaga ebyakola kaisi iye oMwana akole ebintu byonabyona oIteeye onyere ebyakola. Era mwewunye n'akinu muti yalimulaga okukola eby'amaani n'ebikiraku n'ekyo ekyokulamya omusaiza oyo. 21 Era ng'oIteeye owaazuukiza, atyo n'oMwanawe niiye owaagabira abo abeyeesiimira obwomi obutawaawo. 22 Tete n'ekindi kiri kiti oIteeye mpaawo kadi moiza ogwasalira omusango, wazira iye oMwanawe niiye oguyawaire obwezye okusala emisango gyonagyona. 23 Ekyo kityo kaisi abantu bonabona bezye okuwa oMwana ekitiisya ekyo ekibawa oIteeye. Era singa omuntu yenayena tawa oMwana ekitiisya era mazima abba tawa n'oIteeye ekitiisya, iye nago eyamutumire."

²⁴ Awo oYesu ni yeeyongera ati, “Era mbakobera amazima nti iye oyo awulira ebibono byange, n’aikirirya oyo eyantumire, abba n’obwomi obutawaawo, era tibalimusingisya omusango. Abba azwire omu kufa, n’asuna obwomi obutawaawo. ²⁵ Era mbakobera amazima nti ekiseera owekiri awo kituukire, abafu owebaliwulira eigono ly’oMwana wa Kibbumba ni basuna obwomi obutawaawo. ²⁶ Iye oKibbumba ali n’obwezye obugabira omuntu obwomi, era obwezye obwo nago yabuwaire oMwanawe. ²⁷ Era yamuwaire n’obwezye okusalira abantu emisango olwakubba Mwana wa Muntu.

²⁸ “Era ekyo timwakyewunya olwakubba ekiseera kiiza, bonabona abafu owebaliwulirira eigonolye, ²⁹ era ni bazwa emagombe. Ibo abakola ebisa, balizuukira ni basuna obwomi obutawaawo. Neye ibo abo abakola ekibbikibbi, balizuukira ni babasingisya omusango. ³⁰ Era nze mpaawo ekimpezya okukola okulwange. Nsala omusango ng’oKibbumba obwankoba. N’olwekyo ensala yange ya bwenkanya olwakubba nkolera ku kiidi iye oodi eyantumire ekyasiima, tiku ninze ng’owembona.”

Ibo abakakasa ikyo oYesu ekyali

³¹ Awo oYesu ni yeeyongera ati, “Aale singa ninze zenkani nga mpaawo gondi akobera abantu ebinkwataku, timwandibbaire mukakasa ikyo ekineyeeta. ³² Neye waliwo ogondi akobera abantu ebinkwataku. Iye oyo nago Kibbumba

era mmaite nti obujulizibwe obunkwataku butuuce. ³³ Cooka inywe mwatumire abakwenda egiri oYokaana, neye era yena n'awa obukakafu ikyo ekyendi. ³⁴ Ekyo tinkikoba lwakubba ntaka bujulizi ibwo obwa muntu-obuntu, neye ntumula oku bujulizi bwa Yokaana kaisi mwezye okwikirirya era mulokoke. ³⁵ Ibwo obukwenda oYokaana obuyabaleeteire bwabbaire ooti itaala eryaka okubamolekera era bwabazwereiremu okubba basangaali okumalaku kaseera-buseera.

³⁶ "Neye ndi n'obukakafu obukiraku obwo oYokaana obuyantumwireku. Era obukakafu nago bubonekera mu mulimo ogw'amaani nago oBbaabba oguyampaire okutuukirirya era n'ebintu ebinkola bikakasa biti nze oBbaabba dala yantumire. ³⁷ Era oBbaabba iye eyantumire, onyere akakasa ikyo ekyendi. Inywe timuwulirangaku eigonolye, waire okumubonaku amaiso oku maiso. ³⁸ Era n'omu myoyo gyanywe mpaamu ekibono kya Kibumba nago olwakubba oyo oguyatumire tumwikiririyamu.

³⁹ "Cooka inywe mwekenenya nga musoma eBiwandiike olwakubba museega muti omu Biwandiike nago niimwo omu mwalisuna obwomi obutawaawo, era oomwo niimwo omu bakakasira ebinkwataku. ⁴⁰ Cooka inywe tete mugaana okwiza egyendi kaisi mwezye okusuna obwomi obutawaawo."

⁴¹ Awo oYesu ni yeeyongera ati, "Tintumula lwakutaka bantu kumpuuja, ⁴² neye nze

mbategeera era mmaite nti inywe omu myoyo gyanywe, oKibbumba iye timumutaka. ⁴³ Aale mubone eenu, nze naizire omu liina lya Bbaabba, neye timwanjanirizire. Neye singa omuntu ogondi obwaiza okululwe, oyo iye mumwaniriza. ⁴⁴ Aale atyanu mwezya mutya okunjikiririryamu, nga mwikirirya kuwuujangana okwanywe inywe abananyere, kaisi nga timufa ku kuudi okuzwa egiri oKibbumba oyo omoiza yenkani?”

⁴⁵ Era oYesu ni yeeyongera ati, “Neye timuseega muti ninze enalibaloope e wa Bbaabba. Wazira abaloope, iye Musa inywe ogumulimu eisuubi okubawozererya. ⁴⁶ Aale owekibba nti mwaikiririirye omu Musa, zena mwandibbaire munjikiririryamu olwakubba iye yena yampandiikireku. ⁴⁷ Neye owemubbanga timwikirirya ebiyawandiikire, aale tete mubba mwaikirirya mutya ebinkoba?”

6

OYesu aliisya abantu 5,000

(Mat 14:13-21; Mak 6:30-44; Luk 9:10-17)

¹ Ekiseera owekyabitirewo ebyo nga biwoire, oYesu n’asalamu enyanza oGaliraaya, eriina erindi bati Tibberiyo, n’asomoka okwitale kudi. ² Era ekiyindi ky’abantu kinene ni kimusengererya olwakubba baboine obumanyiciryo bw’ebyewunyo obuyabbaire akolere omu kulamyababwe. ³ Awo oYesu n’abeegibe ni baniina oku kasozi, era n’atyama eeyo aamo nabo. ⁴ Omu kiseera ekyo

oMukolo ogw'aBayudaaya ogw'oKutambukirya, gwabbaire guli kumpi okutuuka.

⁵ Kale awo oYesu n'agangamula omutwe, era n'abona ekiyindi ky'abantu nga kyaba egyali, kaisi n'akoba oFiripo ati, "Twagula yaina ekyokulya, abantu abo bonabona ekibaalya?"

⁶ OYesu ekyo yakibwirye kugezesya Firipo olwakubba oYesu iye yabbaire amaite ekyayaba okukola.

⁷ OFiripo n'amwiramumu ati, "Waire singa tubbaire n'edinaali* 200 okugula ekyokulya buli muntu okusunaku waire katono, era tikimala."

⁸ Awo ogondi oku beegibe nga niiye Andereya omuganda wa Simooni Peetero, n'asiiryaku eigono ng'akoba oYesu ati, ⁹ "Aanu waliwo omwisuka alikuuwo n'emigaati mitaanu egibasumbire omu busye bwa bbaale,† n'enyanyi ibiri. Neye oku bantu abangi bati, ebyo-so bigasa niki?"

¹⁰ Iye oYesu n'akoba ati, "Mutyamisye abantu." Omu kifo ekyo wabbairewo eisubi lingi erisa ly'okutyamaku. Awo abantu bonabona ni batyama. Ibo abasaiza bonkani ababbairewo babbaire ooti 5,000. ¹¹ Awo oYesu n'aginga obugaati nago budi, ni yeebalya oKibbumba kaisi n'awa abeegibe ni babugabira abantu nga batyame. Era n'oku bukafingiri n'akola atyo. Bonabona ni basuna ng'owebatakire.

¹² Owebamalire okwikuta, n'akoba abeegibe ati, "Mukumbaanirirye ebitudutundu

* **6:7** 6:7 Edinaali emoiza yaabbanga niiyo empeera y'omupakasi ey'olunaku. † **6:9** 6:9 Obbaale ali ooti mwemba era iye w'ebbeeyi ntono ino oku ngaano.

ebifiikireku okutabebenyesyanya ekyokulya nago.”¹³ Kale ni babukumbaanirirya, era ni baizulya ebiibo ikumi na bibiri eby’ebitundutundu eby’obugaati obutaanu obwa bbaale obwafiikireku nga bamalire okulya.

¹⁴ Awo oluzwanyuma abantu owebaboine aka-manyiciryo k’ekywunyo oYesu akeyakolere, ni batandiika okutumula bati, “Dala onu niye onaabbi oodi oMusa oguyatumwireku ati yaliiza oku kyalo!”¹⁵ Kale oYesu oweyategeire ati babbaire batira okwaba okumukwata bamwazyebamusuuce kabaka, tete era n’abazwaku ni yeeyongerayo e ngulu oku kasozi, n’abba eeyo yenkani.

*OYesu atambula oku maizi
(Mat 14:22-33; Mak 6:45-52)*

¹⁶ Awo esaawa egy’eigolo owegyatuukire, abeege ba Yesu ni baserengeta oku nyanza oGaliraaya,¹⁷ ni baniina omu lyato, ni basalamu enyanza okwaba omu kibuga e Kaperenawumu. Omu kiseera ekyo obwire bwabbaire nga bwirugaire era oYesu yabbaire akaali okubeegaitaku.¹⁸ Era ogumpunga ogw’amaani gwabbaireku, era amayengo ni geyongera okubba g’amaani oku nyanza.

¹⁹ Awo owebabbaire bankavugaku ekiromita ooti ina ooba itaanu, ni babona oYesu ng’atambula oku maizi, ng’asembera okumpi n’eryato. Era owebamuboine ni batya ino.²⁰ Neye iye n’abakoba ati, “Ninze, timwatya!”²¹ Kale awo babbaire bataka okumwingirya omu lyato, amangu ago eryato ni lituuka oku lukalu egibabbaire baaba.

Abantu banoonia oYesu

²² Oku lunaku olwairireku, ekiziima eky'abantu ababbairere basigaire oku lubba ludi olw'enyanza ni banoonia oYesu nga tibamubona. Kale awo ni beewukirya bati omu lyato eryabbairere, oYesu tiyaniiniremu okwabira aamo n'abeegibe, wazira abeegibe baabire bonkani. ²³ Awo ni wabbaawo amaato agandi agazwire e Tibberiyu, ni gatuuka okumpi n'ekifo ekyo nago abantu owebaliriire obugaati, ng'oMusengwa oYesu amalire okwebalya oKibbumba. ²⁴ Kale abantu owebamanyicirye bati oYesu n'abeegibe babulawo, ni baniina omu maato ago okwaba e Kaperenawumu okumunoonia.

OYesu niye ekyokulya eky'obwomi

²⁵ Awo abantu owebaajiirye oYesu oku lubba ludi olw'enyanza, ni bamubuulya bati, "Musesya, waizire eenu di?"

²⁶ Iye oYesu n'abairamu ati, "Inywe mbakobera amazima nti timunnoonia olwakubba mwaboine obumanyiciryo obw'ebwonyo obunkola, neye munnoonia lwakubba mwaliire obugaati budi ni mwikuta.

²⁷ Timwemaliranga mu kukolerera kusuna kyokulya ekibebenyeka, wazira mwemalirenge mu kukolerera kusuna kyokulya kidi eky'omwoyo abantu ekibalya ni basuna obwomi obutawaawo. Iye agaba ekyokulya ekyo nago niye oMwana wa Muntu. Ekyo kityo olwakubba niye oKibbumba iye olteeye oguyawaire akamanyiciryo k'obwezye obwo."

²⁸ Awo ni bamubuulya bati, “Tuteekwa kukola niki okutuukirirya ebyo oKibbumba ebyataka?”

²⁹ Iye oYesu n’abairamu ati, “Ikyo oKibbumba ekyataka mukole, niikyo kinu; kwikiririrya mu Mwana wa Muntu iye oyo oguyatumire.”

³⁰ Awo niibo bona okumubuulya bati, “Kamanyiciryo k’ekywunyoki iwe akewatuwa, tukibone kaisi twezye okwikirirya ebyokoba? Era niki ekyoyezya okukolawo? ³¹ Ibo abazeiza baiswe baliire ekyokulya ekibeeta emaanu omu kitera, ng’owekikoba omu Kiwandiike kiti, ‘Yabawaire ekyokulya okuzwa omwigulu balye.’”

³² Awo oYesu n’abakoba ati, “Mbakobera amazima nti oMusa tiniye eyawaire abazeiza baanywe ekyokulya okuzwa omwigulu, wazira oBbaabba niiye agaba ekyokulya ekituuce okuzwa omwigulu. ³³ Ekyo kityo olwakubba ekyokulya oKibbumba ekyagaba, niiye oyo oguyatumire okuzwa omwigulu era agabira abantu obwomi obutawaawo.”

³⁴ Awo niwo ibo okumukoba bati, “Sebo, okuzwa olwatyano otuwenge kyokulya ekyo nago.”

³⁵ Iye oYesu n’alangerira ati, “Ninze ekyokulya eky’obwomi obw’omwoyo bw’omuntu. Era iye aiza egyendi era n’anjikiririryamu, enzala waire nyonta tiyalimumulumu kadi.”

³⁶ Era oYesu ni yeeyongera n’abakoba ati, “Era nga mbakobeire, mumboine era musigaire nga timunjikiririryamu. ³⁷ Abantu bonabona oBbaabba abampa baiza egyendi, era buli aiza

egyendi, tinalimubbinga. ³⁸ Ekyo kityo olwakubba tinaizire okuzwa omwigulu kukola bintaka, neye naizire kukola biibyo oKibbumba oyo eyantumire ebyataka. ³⁹ Era binu niibyo ebintu eyantumire ebyataka, tataka ngo-tyeku kadi muntu omoiza kwabo abeyampaire, neye ataka mbazuukize oku lunaku oluyalisaliraku emisango. ⁴⁰ Kale oBbaabba ekyataka kiri kiti, buli muntu ategeera ati ndi Mwana wa Kibbumba n'anjikiririryamu asuna obwomi obutawaawo, era nalimuzuukiza oku lunaku olwenkomerero."

⁴¹ Awo abeekubbemberi b'aBayudaaya ni beezulugumira oYesu olwakubba yakobere ati, "Ninze ekyokulya ekyazwire omwigulu." ⁴² Era nga bakoba bati, "Omusaiza onu tiniye oYesu omwana wa Yusufu? Oiteeye n'omaaye tuba-maite. Kale ayezya atya atyanu okukoba ati, 'Nazwire omwigulu?' "

⁴³ Iye oYesu n'airamu ati, "Mulekeraawo okwezuluguma abanyere oku banyere. ⁴⁴ Mpaawo ayezya okwiza egyendi wazira nga oBbaabba eyantumire niiye amulungamirye, era nze nalimuzuukiza oku lunaku olw'enkomerero. ⁴⁵ Bakiwandiikire omu kitabo ky'abanaabbi bati, 'Bonabona oKibbumba yalibeegesya.' Kale buli awulira oBbaabba era n'ayega, aiza egyendi. ⁴⁶ Mpaawo muntu abonangaku oBbaabba oku-toolaku oyo eyazwereire omwigulu.

⁴⁷ "Mbakohera amazima nti oyo anjikiririryamu, asuna obwomi obutawaawo.

⁴⁸ Ninze ekyokulya eky'obwomi obw'omwoyo.

⁴⁹ Abazeiza baanywe baliire emaanu omu kitera, era ni bafa. ⁵⁰ Neye kiinu ekyokulya ekizwa omwigulu, ikyo omuntu ekyayezya okulya nandi n'afa. ⁵¹ Nze ninze ekyokulya eky'obwomi obw'omwoyo ekyazwire omwigulu. Era singa omuntu yenayena alyaku ekyokulya ekyo, yalibba mwomi emirembe n'emirembe. Era ekyokulya ekyo nago, niigwo omubiri gwange ogunaliwaayo olw'abantu b'oku kyalo okusuna obwomi bw'omwoyo."

⁵² Awo abeekubbemberi ba Bayudaaya ni banyiiga era ni batandiika okwakana abanyere oku banyere nga bakoba bati, "Omusaiza onu ayezya atya okutuwa omubirigwe okugulya?"

⁵³ OYesu n'abakoba ati, "Mbakohera amazima nti singa owemutalya omubiri gwa Mwana wa Muntu, era singa owemutanywa eisaayerye timwezya okubba boomi emirembe n'emirembe.

⁵⁴ Neye oyo alya omubiri gwange, era n'anywa n'eisaaye lyange, abba n'obwomi obutawaawo era nalimuzuukiza oku lunaku lw'enkomerero.

⁵⁵ Ekyo kityo olwakubba omubiri gwange kyokulya ky'omwoyo ekinanyerenyeere, era eisaaye lyange kyokunywa ky'omwoyo ekinanyerenyeere.

⁵⁶ "Kale oyo alya omubiri gwange, era anywa eisaaye lyange, abba n'enkolagana na nze, era zena mba n'enkolagana naye. ⁵⁷ Era kityo nakimo olwakubba, ng'oBbaabba eyantumire owaagaba obwomi, nze ndi mwomi ku lwa bwezyebwe. Era n'omu ngeri enanyere eyo, oyo alya omubiri gwange yalibba mwomi ku lwa bwezye bwange. ⁵⁸ Era ekyo niikyo ekyokulya

ekyazwire omwigulu. Ibo abazeiza baanywe baliire emaanu era ni bafa, neye oyo alya oku kyokulya nze ekingaba, yalibba mwomi emirembe n'emirembe.”

⁵⁹ Ebyo oYesu yabitungwire oweyabbaire ng'ayegesya abantu omwikumbaaniro e Kaperenawumu.

Bangi bazwa oku oYesu

⁶⁰ Awo bangi oku beegibe owebawuliire ebyo, ni bakoba bati, “Enjegesya eyo nga nkakati! Naani ayezya okugiikirirya?”

⁶¹ Neye oYesu yabbaire amaite ati abeegibe beezuluguma olw'enjegesya eyo, kale n'abakoba ati, “Olwo inywe ekyo kibesitalisya? ⁶² Kaisi leero mwaliseega mutya owemwalibona oMwana wa Muntu ng'aniina okukanga omwigulu egiyazwereire!

⁶³ Iye oMwoyo wa Kibumba niye agaba obwomi obutawaawo, neye omuntu tayezya okukola ekintu kyonakyona olw'obwezyebwe okululwe. Era ebibono ebimbakobeire niibyo ebizweraku omuntu okusuna obwomi obutawaawo. ⁶⁴ Neye waliwo abamo kwinywe abatanjikiririryamu.” OYesu yakobere atyo olwakubba oweyatandiikiire okwegesya, yabbaire amaite abo abatanwikiririryemu, era yabbaire amaite n'ayaba okumulyamu olukwe. ⁶⁵ Kale awo ni yeeyongerera okutumula ati, “Eyo niyo ensonga lwaki nabakobeire nti mpaawo ayezya okwiza egyendi ng'oKibumba tamubbeereire.”

⁶⁶ Awo okuzwera nakimo omu kiseera ekiyatumuliremu atyo, bangi oku beegibe ni bamuzwaku, era ni batairayo okutambulanga naye.

⁶⁷ Awo oYesu n'abuulya abeegibe eikumi na babiri ati, "Na inywe nywena mutaka okunzwaku?"

⁶⁸ Iye oSimooni Peetero n'amwiramu ati, "Musengwa, nga twaba eeri naani? Niiwe wenkani otumula ebibono ebikwata oku ngeri ey'okusuna obwomi obutawaawo. ⁶⁹ Era atyanu iswe twikirirya, era tumaite tuti niiwe oMweru azwa eeri oKibbumba."

⁷⁰ Kale awo oYesu n'abairamu ati, "Tininze enabalonderemu inywe eikumi na babiri? Neye omoiza kwinywe omwoyogwe gulimu oSitaani!"

⁷¹ Yabbaire atumula ku Yuda, omwana wa Simooni Isikalyoti oyo eyabbaire ayaba okumulyamu olukwe, waire nga yabbaire moiza oku beegibe eikumi na babiri.

7

OYesu ayaba oku Mukolo ogw'oBusiisira

¹ Ebyo owebyawoire, oYesu n'atambuliranga omu bitundu by'eitwale ly'e Galiraaya nga tasala ensalo okwaba omwitwale ly'e Buyudaaya. Ekyo kityo olwakubba aBayudaaya babbaire eeyo nga bamwekumire okumwita.

² Cooka omukolo ogw'aBayudaaya ogubeeta bati, "Mukolo ogw'oBusiisira," gwabbaire gwatira

okutuuka. ³ Awo abaganda ba Yesu ni bamukoba bati, “Kikwetaagisya ozwe aanu oyabe omwitwale ly’e Buyudaaya kaisi abeegibo beezye okubona ebyamagero ebyokola. ⁴ Ekyo kityo olwakubba mpaawo muntu abisabisa ekyakola neenu ng’ataka abantu bamumanye omu lwatu. Aale ng’owookola ebyamagero binu, oyabe obikolere n’eeyo yona abantu bonabona bakumanye.” ⁵ Ibo abagandabe batumwire batyo olwakubba ibo bona abananyere tibamwikiririyemu.

⁶ N’olwekyo oYesu n’abakoba ati, “Ekiseera ekyange ekituuce ekyokwaba eeyo kikaali okutuuka. Neye inywe ekiseera kyonakyona kituuce inywe okweyabira. ⁷ Ekyo kityo olwakubba inywe abantu tibeezya okubacaawa, neye nze bancaawa olwakubba mbakobera nti ebikole ebibakola bibbibibi. ⁸ Inywe mwabe oku mukolo, nze tinaabe ekiseera kinu, olwakubba ekiseera ekyange ekituuce ekyokwabiramu eeyo kikaali okutuuka.” ⁹ Era oYesu oweyamalire okutumula ebyo, iye n’asigalaku omu Galiraaya.

¹⁰ Neye abaganda ba Yesu owebamalire okwaba oku mukolo, oYesu yena n’abasenjaaku cooka nga timu lwatu, neye mu mbiso. ¹¹ Kaisi eeyo oku mbaga nago abeekubbemberi b’aBayudaaya babbaire bamunoonia nga babuulirirya bati, “Omusaiza oyo nago ali nkonaki?”

¹² Cooka omu kiziima ky’abantu awo, wabairewo okumuweetaku nga kungi omu bantu. Abamo nga bakoba bati, “Musaiza musa.”

Abamo nga ibo bakoba bati, “Bbe, abbeyabbeya abantu.” ¹³ Neye olw’okutya abeekubbemberi b’aBayudaaya, ni watabbaawo amutumulaku omu lwatu.

OYesu oku Mukolo ogw’oBusiisira

¹⁴ Awo akati omu naku gy’omukolo, oYesu n’ayaba omu luuga lw’eYeekaalu, era n’atandiika okwegesya abantu. ¹⁵ Era aBayudaaya ni beewunya ino engeri egyayegesyamu, era ni beebuulya bati, “Omusaiza oyo yasunire atya okumanya okwo atyo aate nga tasomangaku kadi by’ediini?”

¹⁶ Awo oYesu n’abairamu ati, “Binu ebinjegesya tibyanje, wazira bizwa eeri Kibbumba iye eyantumire. ¹⁷ Singa omuntu yenayena asalawo okukola oKibbumba ebyataka, ategeera obanga ebinjegesya bizwa eeri Kibbumba, ooba ntumula byange-kuwange. ¹⁸ Iye omuntu atumula ebibye okululwe abikola lw’okwenoonerya kitiisyakye. Neye oyo akolerera kusunisa yoodi eyamutumire kitiisya, abba atumula mazima, era tabbaamu bubbeyi. ¹⁹ Kaisi oMusa tiyabawaire aMateeka? Mbona kwinywe nywena mpaawo muntu akwata aMateeka ago. Aale nga inywe mukoba muti mugakwata, lwaki musala amalabuki okunjita?”

²⁰ Awo ekiziima ky’abantu ababbairewo ni bamwiramu bati, “Iwe koizi oliku muzimu! Naani asala amalabuki okukwita?”

²¹ Iye oYesu n’abairamu ati, “Nze nakolere ekyewunyo kimo oku Saabbaato, nywenanywena ni kibasisiwalya. ²² Neye nti ny-

wena oku Saabbaato mukomoleraku abaana olwakubba oMusa yabalagiire okukomolanga waire wona tikwatandiikiire ku Musa. Cooka ekinanyerenyeere kiri kiti, okukomola okwo kwatandiikiire ku bazeiza baanywe. ²³ Atyanu obanga beezya okukomola omwana oku Saabbaato, olw'okutavuna eiteeka lya Musa, aale lwaki munnyiigira nze olw'okulamirya n'akimo omuntu oku Saabbaato? ²⁴ Kale okumanya ekituuce, timwasalawo kusinzirira ku ngeri egimubibonamu oku ngulu, neye musinzirire ku nsonga entuuce omu maiso ga Kibbumba."

OYesu niiye oKurisito?

²⁵ Awo abamo oku bantu ab'omu Yerusaalemi ababbaire awo, ni batandiika okwebuulyangana bati, "Omusaiza onu tiniye ogubanoonia okwita? ²⁶ Aate ngonu atumulira mu lwatu, era mpaawo n'ekibamukoba. Ab'obwezye beezya okubba nga bategereire nakimo bati onu niye oKurisito ogubasukireku amafuta? ²⁷ Neye omusaiza onu iye tumaite egyazwera, aate nga iye oKurisito oweyaliiza, mpaawo eyalimanya egyazwera."

²⁸ Awo oYesu oweyabbaire ng'akaali ayegesya omu luuga lw'eYeekaalu, n'alangirira ati, "Inywe museega muti mummaite, era muti n'eginzwera mumaiteyo. Aale mumanye muti tinaizire kulwange, wazira oyo eyantumire dala aliyo, cooka inywe oyo ogumutamaite. ²⁹ Neye nze mmumaite olwakubba nazwire gyali, era niiye eyantumire."

³⁰ Awo ni bagezyaku okumukwata, cooka ni watabbaawo amukubbyaku olwakubba ekiseer-akye eky'okumukwata kyabbaire kikaali okutuuka. ³¹ Neye era bangi omu kiziima ky'abantu ababbaire awo ni bamwikiririryamu, nga bakoba bati, "Kaisi nago oKurisito ogubasukireku amafuta oweyaliiza yalikola obumanyiciryo w'ebyewunyo obukiraku onu obwakola?"

³² Awo aBafalisaayo ni bawulira ng'abantu baweweeta oku oYesu, kale abakabona abakulu n'aBafalisaayo ni batuma abaisulukale okumukwata. ³³ Awo oYesu n'abakoba ati, "Njaba okumala na inywe ekiseera kitono, kaisi njabe egiri oyo eyantumire. ³⁴ Era mwalinnoonia neye timwalimbona, era inywe timwezya okutuuka eginjaba."

³⁵ Awo abeekubbemberi ba Bayudaaya ni bakobangana bati, "Omusaiza onu ataka kwaba yaina egitutalyezya okumubonera? Ataka kwaba giri bantu baiswe badi abasalaanikiire omu Buyonaani, ayezye okwegesya aBayonaani? ³⁶ Ategeeza niki okukoba ati, 'Mwalinoonia, neye timwalimbona,' era ati, 'Inywe timwezya okutuuka eginjaba?' "

Eiruba ly'amaizi ag'obwomi

³⁷ Oku lunaku olusembayo era nga niirwo olukira obukulu oku Mukolo ogw'oBusiisira, oYesu n'ayemerera, era n'atumula maaminkirira ati, "Buli muntu enyonta ogweruma, aize egyendi anywe. ³⁸ Iye yenayena anjikiririryamu

ayezya okwiza n'anywa. Ekyo kityo olwakubba eKiwandiike kikoba kiti: 'Eiruba ly'amaizi ag'obwomi obutawaawo lyalikulumuka nga lizwa omu omuntu oyo nago.' "

³⁹ Ekyo oYesu yakitumwire ng'ategeeza Mwoyo oMweru abamwikiririyamu ogubabbair baaba okusuna egibwizaku. Paka omu kiseera ekyo, babbair bakaali okubawa oMwoyo oMweru olwakubba nti oKibbumba yabbair akaali okugulumalya oYesu.

Obutategeragana kw'abantu oYesu ekyali

⁴⁰ Kale awo abantu b'omu kiziima ekyo owebawuliire ebibono ebyo, abamo ni bakoba bati, "Dala onu niiye onaabbi oodi ogubatusuubizire."

⁴¹ Ibo abandi ni bakoba bati, "Onu niye oKurisito ogubasukireku amafuta." Kaisi abandi ni batala-butali bati, "OKurisito ogubasukireku amafuta ayezya atya okuzwa mu Galiraaya?" ⁴² Ikyo eKiwandiike tikikoba kiti yalizwa mwibyaire lya Dawudi, era balimubyalira mu Bbeserekeemu, ikyo ekibuga omu babyala oDawudi?" ⁴³ Kale omu ngeri eyo abantu ni batuuka omu butategeragana olwa Yesu. ⁴⁴ Era awo abamo kwibo ni bataka okumukwata, neye era ni watabbaawo amukubbyaku.

*Obutaikirirya
b'aBayudaaya*

bw'abeekubbemberi

⁴⁵ Awo ekyazwiremu abaisulukale abakuumi b'eYeekaalu ni bakanga egiri abakabona

abakulu n'aBafalisaayo. Kale ibo ni babu-ulya abaisulukale bati, "Lwaki timumuleetere?"
⁴⁶ Abaisulukale ni bairamu bati, "Mpaawo muntu eyabbaire atumwire eby'amaani ooti bi-idi oodi ebyatumula!"

⁴⁷ ABafalisaayo ni babairamu bati, "Ekimutegeeza muti inywe nywena abaliibirye?"
⁴⁸ Inywe mwabbaire muboineku iswe abafugi baanywe, ooba oMufalisaayo yenayena ng'amwikiririryamu? ⁴⁹ Naire! Okutoolaku ekikoosi ky'abantu abatamaite amateeka ga Musa, kaisi nago ekikoosi ekiraame!"

⁵⁰ Kale iye oNikodemu omoiza kwibo nago abeekubbemberi b'aBayudaaya, era iye enyumaku eyaabire obwire egiri oYesu, awo n'abuulya abainaye ati, ⁵¹ "Amateeka gaiswe* gaikirirya okusalira omuntu omusango nga bakaali okumuwozesya n'okutegeera ekisobyo ekyakolere?"

⁵² Ibo ni bamwiramumu bati, "Kaisi wena ozwera mwitwale ly'e Galiraaya? Weekeeneye eBi-wandiike. Ala omanyeye oti e Galiraaya mpaawo naabbi azwerayo." [⁵³ Kale awo buli muntu n'akanga e wuwe.

8

Omukali ogubakwatiire omu bulendi

¹ Awo iye oYesu n'ayaba oku Lusozi olw'eMisaale eMizaituuni. ² Kaisi amakeezi pwi n'akanga omu luuga lw'eYeekaalu, era abantu bonabona ni baaba egyali, kale

7:50 7:50 Yok 3:1-2 * **7:51** 7:51 Ooba, AMateeka ga Musa.

n'atyama okubeegesya. ³ Yabbaire akaali ali aawo abakugu omu by'aMateeka ga Musa n'aBafalisaayo ni baleeta omukali ogubakwatiire omu bulendi, awo ni bamuteeka akati bonabona owebeezya okumubonera. ⁴ Awo ni bakoba oYesu bati, "Musomesya, omukali onu bamukwatiire omu kikole ky'obulendi. ⁵ Cooka omu Mateeka, oMusa yatulagiire kubakubbanga n'amabbaale ni bafa abakali abebakwatira omu bulendi. Atyanu iwe okoba otya kwekyo?" ⁶ Ibo abakugu bakoleserye ekibuulyo ekyo ng'akatego, kaisi basune ekibazweraku okumuloopa.

Neye oYesu omu kityamo awo n'akotama kaisi n'atandiika okuwandiika ansi n'olunwe. ⁷ Era abavunaana omukali nago owebeeyongeire okubuulya oYesu ebibuulyo, n'agangamuka kaisi n'abakoba ati, "Owewabbaawo mwinywe atakolangaku ekikole ekibbikibbi niye abbe asooke okukubba omukali oyo eibbaale." ⁸ Awo tete oYesu n'akotama, n'awandiika ansi. ⁹ Cooka ibo owebawuliire ekyo, ni batandiika okuzwangawo moiza ku moiza, okusookesya n'abakira obukulu kaisi abatobato ni bairangaku. Abantu beeyongeire okuzwawo paka oYesu oweyasigaire awo yenkani n'omukali nago nga iye akaali ayemereire awo. ¹⁰ Kale awo tete oYesu n'agangamuka, kaisi n'abuulya omukali nago ati, "Mukali iwe, banu bali yaina? Mpaawo agukusingisiry?"

¹¹ Iye omukali nago n'amwiramumu ati, "Mpaawo sebo." Awo oYesu n'amukoba ati, "Na nze zena

tingukusingisya. Aale atyanu weeyabire, neye olekewo empisa y’okukolanga ekibbikibbi.”]*

Obutuuce bw’obujulizi bwa Yesu

¹² OYesu tete oweyabbaire atumula n’abantu, yabakobere ati, “Ninze ekitangaala ekimolekera abantu. Era buli ansengererya tatambulirenge omu ndikiirya, wazira namulungamyanga omu nzira ereeta obwomi.”

¹³ Awo aBafalisaayo ni bamukoba bati, “Iwe onyere weetumulaku anambula gondi akakasa ebyotumula, kale ebiwetumulaku tibikola.”

¹⁴ Iye oYesu n’abairamu ati, “Waire nga ninze onyere owenetumulaku, ebintumula bituuce olwakubba mmaite eginazwire n’eginjaba. Neye inywe timumaiteku eginazwire, waire eginjaba. ¹⁵ Inywe musala omusango kusinzirira ku malabuki g’obuntu, cooka nze mpaawo muntu ogunsalira omusango. ¹⁶ Neye singa owemba kusala musango, ensala yange ebba ntuce olwakubba timba zenkani. Nze mbaawo n’oBbaabba eyantumire. ¹⁷ Ebyo nga biri awo n’omu Mateeka gaanywe ag’eKiyudaaya, bakiwandiikire bati obujulizi bw’abantu ababiri ng’abufaanana bukakasa buti ekibutumulaku kituuce. ¹⁸ Nze nkobera abantu ebinfaaku kaisi ogondi abakobera ebinfaaku niye oBbaabba eyantumire.”

¹⁹ Awo ni bamubuulya bati, “Oiteewo ali yaina?” OYesu n’abairamu ati, “Nze timuntegeera, kadi Bbaabba yena

* **8:11** 7:53-8:11 EBiwandiike ebimo bibulamu enyiriri ginu. **8:12** 8:12 Mat 5:14; Yok 9:5 **8:13** 8:13 Yok 5:31 **8:17** 8:17 Ama 17:6; 19:15

timumutegeera. Aale singa nze mubbaire muntegeera, n’oBbaabba yena mwandibbaire mumutegeera.”

²⁰ Ebibono ebyo oYesu yabitungwire oweyabbaire ng’ayegesya omu luuga lw’eYeekaalu okumpi n’ekifo egibaweranga ebirabo. Neye era omu kaseera ako tiwabbairewo waire moiza amukwata, olwakubba ekiseerakye eky’okumukwata kyabbaire kikaali okutuuka.

OYesu atumula oku kufaakwe

²¹ Awo tete oYesu n’akoba abeekubbemberi ba Bayudaaya ati, “Nze ndi kuzwawo, kaisi era inywe mwalinnoonia, era mwalifeera omu kibbikibbi kyanywe. Era nze eginjaba inywe timwezya okwabayo.”

²² Kale awo abeekubbemberi b’aBayudaaya ni beebuulyangana bati, “Ayaba kweita? Ekyo niikyo ekyategeeza okukoba ati, ‘Nze eginjaba, inywe timwezya okwabayo?’ ”

²³ Awo oYesu ni yeeyongera okukoba aBayudaaya abo nago ati, “Inywe muli b’oku kyalo kunu, neye nze nazwire mwigulu. Inywe muli b’oku kyalo, neye nze tindi w’oku kyalo. ²⁴ Ekyo niikyo ekigira mbakobeire nti mwalifeera omu bikole byanywe ebibbibbi. Era dala mwalibifeeramu okutoolaku nga mwikiriirye muti ninze oyo ng’owenetumulaku.”

²⁵ Awo ni bamubuulya bati, “Weeyeta otya?” OYesu n’abairamu ati, “Ninze oyo ogumbakoberanga nenca okuzwera nakimo

owenatandiikiire okutumula na inywe.
²⁶ Cooka nandibbaire mbatumulaku bingi era n'okubasingisya omusango, neye eyantumire mwesigwa era ekinasunire okuzwa egyali niikyo ekinkobera abantu."

²⁷ Era aBayudaaya abo nago tibategeire bati oYesu yabbaire abakobera kwIteeye oKibbumba. ²⁸ Kale awo oYesu ni yeeyongera ati, "Owemwalimala okwanika oMwana wa Muntu oku musalabba, kaisi awo niiye owemwalitegeerera muti ninze oyo ng'owenetumulaku. Era wemwalitegeerera muti nze mpaawo ekinkola okulwange, neye ntumula biibyo ebinanyerenyeere oBbaabba ebiyanjegeserye. ²⁹ Era nago oyo eyantumire ali na nze, tandekanga zenkani, olwakubba buliijo nkola biibyo ebimusangaalya."

³⁰ Era oYesu n'oweyabbaire atumula ebyo, abantu bangi ni bamwikiririryamu.

Abagalama n'abatali bagalama

³¹ Awo oYesu n'akoba aBayudaaya ibo ababbaire bamwikiririiryemu ati, "Singa owemugumira oku bintu ebimbeegesya, mubbeera nakimo beegi bange. ³² Era awo mwalimanya amazima agazwa e wa Kibbumba, era n'amazima ago galibatoola omu bugalama ni gabasuuca ab'eidembe."

³³ Awo aBayudaaya ni bamwiramu bati, "Iswe tuli baizukulu ba Ibbulaimu, era titubbangaku bagalama b'omuntu yenayena. Atyanu obba otya okutukoba oti twasuuka b'eidembe?"

³⁴ Iye oYesu n'abairamu ati, "Mbakobera amazima nti buli akola ekikole ekibbikibbi, abba mugalama w'ekikole ekibbikibbi. ³⁵ Era iye omugalama tabba w'enkalaakalira omu kisito oomwo, neye omwana abba waamu emirembe n'emirembe. ³⁶ N'olwekyo oMwana wa Kibbumba owabasuuca ab'eidembe okuzwa omu bugalama obwo, mwalibba b'eidembe ino. ³⁷ Inywe mukoba muti muli baizukulu ba Ibbulaimu, aate nga musala amalabuki okunjita olwakubba ebintu ebinjegesya timubiikirirya. ³⁸ Cooka nze mbakobera ebinaboine e wa Bbaabba, na inywe mukola bya itewaanywe oSitaani ebyabakoba."

³⁹ Awo ibo ni bamwiramumu bati, "Iswe ozeiza waiswe Ibbulaimu." Iye oYesu niye okubakoba ati, "Singa mubbaire baizukulu ba Ibbulaimu, mwandibbaire mukola oIbbulaimu ebiyakolere. ⁴⁰ Neye era kityo wekiri olwakubba muli bamaliriri okunjita, cooka nze omusaiza abakobeire amazima agenawuliire okuzwa eri oKibbumba. Iye oIbbulaimu ebyo tiyabikolere. ⁴¹ Inywe mukola biiby oitewaanywe ebyakola."

Ibo ni bamukoba bati, "Iswe tituli baana b'e nza, tuli baana bananyerenyeere aba Kibbumba."

⁴² Iye awo oYesu n'abakoba ati, "Singa dala muli baana ba Kibbumba, mwankubbaire muntaka olwakubba nazwire giri Kibbumba, era tinaizire kulwange, wazira iye onyere niye eyantumire. ⁴³ Aale lwaki mubba timutegeera ebintumula? Timwezya okubitegeera olwakubba timutaka okubiikirirya.

⁴⁴ Cooka inywe muli ba itewaanywe oSitaani, era muyayaanira kukola biibyo oitewaanywe ebyasiima. Iye okuzwera nakimo owebabumbiire ekyalo iye mutemo, era iye tagumira oku mazima ga Kibbumba olwakubba mwiye mpaamu mazima. Era owaatumula obubbeyi, abba atumula kiidi eky'ekikulakye olwakubba iye mubbeyi, era niiye okibyali w'obubbeyi. ⁴⁵ Neye nze olwakubba ntumula amazima ga Kibbumba, timwikirirya ebinkoba.”

⁴⁶ Era awo ni yeeyongera ati, “Waliwo kwinywe ayezya okunnumiriza ekibbikibbi? Aale owemba nti ntumula mazima, lwaki timwikirirya ebinkoba? ⁴⁷ Iye omuntu wa Kibbumba, awulira ebibono bya Kibbumba. Kale inywe ekigira ni mutawulira oKibbumba, kiri kiti, timuli ba Kibbumba.”

OYesu n'oIbbulaimu

⁴⁸ Awo abeekubbemberi b'aBayudaaya ni bairamu oYesu bati, “Tituli batuce okukoba tuti oli ooti Musamaaliya era oliku muzimu?”

⁴⁹ Iye oYesu n'abairamu ati, “Nze tindi ku muzimu, wazira nteekamu oBbaabba ekitiisya, neye inywe mumbityamu amaiso. ⁵⁰ Nze tindi kwenoonyanga kitiisya mwinywe. Neye waliwo oodi, aate nga niiye omulamuzi omu nsonga eenu, ali kutakanga ati nze bampe ekitiisya. ⁵¹ Cooka mbakobera amazima nti singa omuntu yenayena akwata ekibono kyange tiyalifa emirembe n'emirembe.”

⁵² Awo aBayudaaya abo nago owebawuliire ebyo ni bamukoba bati, “Atyanu tukakasiire

nakimo tuti oli mugwairalu! Obanga oIbbulaimu yafiire, era n'abanaabbi bona bafiire, kaisi iwe n'okoba oti omuntu yenayena akwata ekibonokyo tiyalirega oku kufa naire! ⁵³ Iwe okiraku ozeiza waiswe oIbbulaimu? Obanga iye yafiire era n'abanaabbi bona bafiire! Iwe weeyeta otya?"

⁵⁴ Iye oYesu n'abairamu ati, "Singa nze owenegulumalya, ekitiisya kyange kibba kinambulamu. Cooka iye oBbaabba, oyo inywe ogumukoba muti niye oKibbumba waanywe, niye angulumalya. ⁵⁵ Waire inywe timumutegeera, neye nze mmutegeera. Era singa nkobere nti timmumaite, nandibbaire mubbeyi ooti niinywe. Neye nze mmumaite, era nkwata ekibonokye. ⁵⁶ Iye ozeiza waanywe oIbbulaimu oweyamanyiciryete ati baaba okuntuma oku kyalo yajaa-gaanire era n'abba ng'akirengerera yala omu mwoyogwe era oweyakiboine n'abba musangaali."

⁵⁷ Awo abeekubbemberi ba Bayudaaya nago ni bamukoba bati, "Iwe akaali okwerya emyanka 50 egy'obukulu, era waboineku oIbbulaimu!" ⁵⁸ OYesu n'abakoba ati, "Mbakohera amazima nti oIbbulaimu babbaire bakaali n'okumubyala, nga nze ndiwo." ⁵⁹ Awo owebawuliire ekyo ni bakwata amabbaale okumukubba, neye oYesu ni yeebisa, era n'awuluka okuzwa omu luuga lw'eYeekaalu.

9

OYesu alamyā ogubabyaire nga mwofu

¹ Awo oYesu oweyabbaire atambula n'abeegibe, n'abona omusaiza ogubabyaire nga mwofu. ² Ibo abeegibe ni bamubuulya bati, "Musomesya, oku musaiza oyo n'ababyairebe naani eyakolere ekikole ekibbikibbi ekyagirire ni bamubyala nga mwofu?"

³ OYesu n'abairamu ati, "Timusaiza oyo ooba babyairebe niibo abakolere ekikole ekibbikibbi, neye bamubyaire nga mwofu kaisi abantu beeye okubona amaani ga Kibbumba nga gakola mwiye. ⁴ Aale nga kukaali musana omuntu owaayezyerya okukola, kyetaagisya okukola omulimo gw'oyo eyantumire. N'olwekyo, nkola omu kiseera kinu olwakubba ekiseera kiiza obwire nga bwirugaire owenalibba nga tinkaali mpezya okukola. ⁵ Cooka nze nga nkaali ndi oku kyalo, ninze ekitangaala ekimolekera abantu."

⁶ Awo oYesu oweyamalire okutumula ebyo, n'ayanda ebitanta ansi okwitakali, era n'atuga eitakali eeryo n'ebita, kaisi n'alisiiga oku maiso g'omusaiza omwofu nago. ⁷ Awo kaisi n'amukoba ati, "Oyabe onaabe omu maiso oku kidiba ekibeeta oSirowaamu."* Kale omusaiza oyo n'ayaba n'anaaba omumaiso era n'akanga e ika ng'abona.

⁸ Cooka abaliranwabe n'abantu abandi abamubonanga ng'asabirirya owebamuboine, ni babuulyangana bati, "Omusaiza oyo tiniye eyatyamanga eedi era n'asabiriryanga?" ⁹ Era abamo kwibo nago ni bakoba bati niiye. Ibo

9:5 9:5 Mat 5:14; Yok 8:12 * **9:7** 9:7 Kitegeeza Ogubatumire.

abandi nga bakoba bati, “Kadi, amufaanana-bufaanani.” Neye omusaiza onyere n’abakakasa ati, “Ninze omusaiza eyabbaire omwofu.”

¹⁰ Kale awo ni bamubuulya bati, “Aale atyanu amaisogo gabbaire gatya okubona?” ¹¹ Awo iye n’abairamu ati, “Omusaiza ogubeeta oYesu niiye eyatugire eitakali kaisi n’alinsiiga oku bitigi. Era n’ankoba okwaba oku kidiba oSirowaamu okunaaba omumaiso. N’olwekyo ni njaba, ni naaba, era ni mpezya okubona.”

¹² Awo ibo ni bamubuulya bati, “Omusaiza oyo nago ali yaina?” Iye n’abairamu ati, “Timmeraite.”

Okunoonererya oku kulama kw’omwofu

¹³ Awo abantu abo ni baaba n’omusaiza nago eyabbaireku omwofu eeri abamo oku Bafalisaayo. ¹⁴ Cooka olunaku oYesu oluyatugiireku eitakali era n’okulanya amaiso ag’omusaiza nago, lwabbaire ku Saabbaato. ¹⁵ N’olwekyo aBafalisaayo bona ni babuulya omusaiza oyo engeri egiyalamiremu amaiso. Iye n’abairamu ati, “OYesu yatugire itakali n’alinsiiga oku bitigi, kaisi ni njaba ni naabaku era atyanu mbona.”

¹⁶ Awo abamo oku Bafalisaayo ni bakoba bati, “Omusaiza oYesu oyo tiyazwire wa Kibbumba olwakubba takwata eiteeka ly’eSaabbaato.” Neye abandi ni bakoba bati, “Omuntu akola ebibibibi ayezya atya okukola obumanyiciryo w’ebiyewunyo obwenkana awo?” Kale ni wabbaawo okugabukanamu omu biseego.

¹⁷ Awo ekyazwiremu abeekubbemberi b’aBafalisaayo tete ni baira oku musaiza eyabbaire omwofu era ni bamubuulya bati,

“Yakulamirye niiwe amaiso. Iwe omutumulaku otya?” Iye n’abairamu ati, “Nseega nti naabbi.”

¹⁸ Neye abeekubbemberi b’aBayudaaya era tibaikiriirye bati omusaiza oyo yabbaireku mwofu n’alama-bulami, paka owebatumisirye okweta ababyairebe. ¹⁹ Kale ababyairebe owebatuukire, omoiza oku beekubbemberi n’ababuulya ati, “Onu mutaane waanywe? Niiye onu ogumukoba muti mwamubyaire nga mwofu? Kiiza kitya okubba nti atyanu ayezya okubona?”

²⁰ Awo ababyaire b’omusaiza nago ni bairamu bati, “Tumaite tuti oyo mutaane waiswe, era tumaite tuti twamubyaire nga mwofu. ²¹ Neye titumaite owebyabbaire kaisi atyanu n’abba ng’ayezya okubona, era titumaiteku eyamulamirye amaiso. Onyere ngoyo muntu mukulu, mumubuulye, iye onyere yeetumulira.” ²² Cooka ababyaire b’omusaiza eyabbaire omwofu batumwire batyo lwa kutya beekubbemberi b’aBayudaaya. Ekyo kityo olwakubba aBayudaaya babbaire bamalire okutegeragana bati buli muntu eyabbutulanga ati oYesu niiye oKurisito ogubasukireku amafuta, bamubbinganga-bubbingi omwikumbaaniro. ²³ Era ekyo niikyo ekyagirire ababyaire b’omwofu nago ni bakoba bati, “Onyere ngoyo muntu mukulu, mumubuulye.”

²⁴ Kale awo tete omulundi gwokubiri ni beeta omusaiza nago eyabbaireku omwofu, ni bamukoba bati, “Otumule amazima omu maiso ga

Kibbumba,† Iswe tumaite tuti omusaiza ogwotumulaku akola ebibbibbi.”

²⁵ Iye n’abairamu ati, “Ooba akola ebibbibbi ooba bbe, nze timmaite. Cooka nze ekintu kimo ekimmaiteku nti nabbaire mwofu neye atyanu mbona.”

²⁶ Tete ni bairamu okumubuulya bati, “OYesu niki ekiyakukolere? Era yakulamirye atya amaisogo?”

²⁷ Iye n’abairamu ati, “Mbakobeire ira ni mugaana okuwulisisya. Olwo lwaki tete mutaka okubiwulira? Nywena mutaka kusuuka beegibe?”

²⁸ Awo ni bamuzuma, era ni bakoba bati, “Niiwe omwegi w’amusaiza nago, neye iswe tuli beegi ba Musa. ²⁹ Era iswe tumaite nakusani tuti oKibbumba yatumwire n’oMusa, neye oyo omusaiza iswe titumaite n’egyazwera.‡”

³⁰ Awo iye omusaiza eyabbaireku omwofu n’abairamu ati, “Kinu nga kyewunyisya ino, inywe okukoba muti timumaite omusaiza oyo egyazwera, aate nga nze yandamirye amaiso!

³¹ Cooka tumaite tuti oKibbumba tairamu okusaba kw’abakola ebibbibbi. Neye airamu kusaba kw’omuntu amuwa ekitiisya, era akola oKibbumba iye ebyataka. ³² Aate mpaawo awulirangaku ati balamirye amaiso ga muntu ogubabyaire nga mwofu. ³³ Kale oyo eyandamirye amaiso singa oKibbumba tiniye eyamutumire, tiyandyezyerye okukola ekyo ekiyakolere.”

† 9:24 9:24 Ooba, Ogulumalye oKibbumba. ‡ 9:29 9:29 Ooba, Titumaite egyatoola obwezye.

³⁴ Iye omusaiza oyo oweyakobere atyo aBayudaaya abo nago ni bamukoba bati, “Iwe ogubabyaliire mu kibbikibbi era n’okulira mu kibbikibbi, wena niwe ogezyaku okutwegesya iswe?” Era ni bamubbinga omwikumbaaniro.

Obwofu bw’obwomi bw’omwoyo

³⁵ Kale awo oYesu n’awulira ati omusaiza oguyalamirye amaiso bamubbingire omwikumbaaniro. Era oYesu n’ayaba n’amunoonia era n’amubona. Awo oweyaboine omusaiza nago, oYesu n’amubuulya ati, “Oikiririrya omu Mwana wa Muntu?” ³⁶ Iye n’amwiramu ati, “Sebo, niye onaani oyo? Kaade onkobere njezye okumwikiririyamu?”

³⁷ OYesu n’amukoba ati, “Omalire atyanu okumubona; era dala niye onu atumula na iwe.” ³⁸ Awo iye omusaiza oyo n’amwiramu ati, “Musengwa, nkwikiririyamu,” era n’akoma amazwi okusinza oYesu.

³⁹ Kale awo oYesu n’akoba ati, “Nze naizire oku kyalo kumanyikisya bantu ebibbibibi byabwe, kaisi ababbaire boofu bezye okubona, tete ababbaire babona, boofuwale.”

⁴⁰ Awo aBafalisaayo ababbaire awo okumpi n’oYesu, owebawuliire ng’oYesu atumula atyo, ni bamubuulya bati, “Okoba niki? Ekyokoba swena tuli boofu?”

⁴¹ OYesu n’abakoba ati, “Singa mubbaire boofu, timwandibbaireku omusango gw’ekibbikibbi. Neye atyanu ng’owemukoba muti mubona, musigala n’omusango gw’ekibbikibbi kyanywe.”

10

Olugero lw'omuliisya w'entaama

¹ Awo oYesu n'abakoba ati, "Mbakobera amazima nti omuntu atabita omu mulyango ng'aingira omu kiraalo ky'entaama, neye ni yeeyazya kungirira* awandi, oyo abba mwibbi era mukondo. ² Iye oyo aingirira omu mulyango niye omuliisya onyere entaama. ³ Era omukuumi w'ekiraalo amwigulirawo, n'entaama gitegeera eigonolye iye ng'omuliisya waagyo. Entaamagye agyeta amaliina, era n'agiwuluca e nza. ⁴ Owaamala okugiwuluca gyonagyona, agyekubbemberera ni gimusengererya olwakubba gimaite eigonolye. ⁵ Neye tigyalisengereryaku kadi ogugitamaite, wazira gimwirukaku-bwiruki olwakubba tigimaite eigonolye."

⁶ OYesu yatumwire n'abantu ababbaire awo omu lugero lunu, neye tibategeire ekiyabbaire abakoba.

OYesu niye omuliisya w'entaama omusa

⁷ Kale awo oYesu tete n'atumula nabo ati, "Mbakobera amazima nti ninze aali ooti mulyango gw'ekiraalo ky'entaama. ⁸ Ibo abandi bonabona abaizire nga nkaali okwiza nga beefananyiriza nze, baibbi era bakondo, neye ng'entaama owegitawulisisya ogugitamaite, abantu bona tibabawulisisirye. ⁹ Ninze omulyango, era buli muntu yenayena abita mu nze alokoka.† Ibo abo babba ooti ntaama egingira era ni giwuluka okwaba okuliisya.

* **10:1** 10:1 Ooba, Kuniinira. † **10:9** 10:9 Ooba, Asuna eidembe.

¹⁰ Iye omwibbi aizirira kwibba, n’okwita, n’okujigirica. Neye nze naizire, kaisi abantu babbe n’obwomi, era babbe nabwo mu bwizulye.”

¹¹ Era oYesu ni yeeyongera okukoba ati, “Ninze omuliisya w’entaama omusa, iye oyo awaayo obwomibwe olw’entaamagye. ¹² Cooka iye omupakasi, iye tabba ooti muliisya onyere entaama. Era owaabona omusege nga gwiza, iye alekaawo-buleki entaama ni yeirukirawo. Kale awo omusege gwiza ni gulumba entaama, ni gukwataku omoiza waaku era n’egindi ni gisalaanika. ¹³ Iye yeirukirawo olwakubba iye mupakasi era entaama tagirumirwa.

¹⁴ “Neye nze ndi muliisya w’entaama omusa. Nze mmaite entaama gyange era gyona gimmaite. ¹⁵ Ekikoba nti, ng’oBbaabba owammaite ati ndi mwanawe, zena ntyo mmumaite nti niye oBbaabba, era mpaayo obwomi bwange oku lw’entaama gyange. ¹⁶ Cooka ndi n’entaama egindi egitali gy’omu kiraalo kinu. Nteekwa gyona okugireeta. Era gyona gyaliwulira eigono lyange, era walibbaawo ekiraalo kimo n’omuliisya moiza. ¹⁷ Era ekigira oBbaabba n’abba antaka, niikyo nti nze naliwaayo obwomi bwange ni banjita oku lw’entaama gyange kaisi tete ni nzuukira. ¹⁸ Neye mpaawo aali n’obwezye okunjita, wazira nze onyere naliwaayo-buwi obwomi bwange. Ndi n’obwezye okubuwaayo, era n’oluzwanyuma tete okubweirirya. Era ekyo niikyo oBbaabba ekiyandagiire okukola.”

¹⁹ Awo, olw'ebibono ebyo tete abeekubbe-
mberi b'aBayudaaya ni bagabukanamu omu
nseega. ²⁰ Era abakira obungi kwibo ni bakoba
bati, "Oyo aliku omuzimu, era agwire eiralu,
lwaki mumuwulisisya?"

²¹ Cooka ibo abandi nga bakoba bati, "Ebyo
tiniibyho ebibono by'omuntu aliku omuzimu.
Aale omuzimu gwona gwezya okulamyama
g'omwofu?"

*Obutaikirirya
b'aBayudaaya*

bw'abeekubbemberi

²² Awo ng'ebyo biwoire, omu Yerusaalemi, ni
wabbaawo oMukolo ogw'oKuwonga eYeekaalu,
era bwabbaire bwire bwa buwolondoki. ²³ Era
oYesu yabbaire atambulatabwala omu luuga
lw'eYeekaalu, omu kigango ekibeetanga bati
poochi ya kabaka oSulemaani. ²⁴ Awo aBayudaaya
abamo ni bamweruguulirirya, ni bamubuulya
bati, "Walituuca di okutuleka omu kubuusabu-
usa? Otukobere lwatu obanga niwe oKurisito
ogubasukireku amafuta."

²⁵ OYesu n'abairamu ati, "Nabakobeire
eira, neye timwaikiriirye. Obukakafu
bw'ekyo ekyendi niibyho ebyewunyo ebyenkola
omu bwezye bwa Bbaabba. ²⁶ Neye
inywe timunjikirirya olwakubba timuli
bange. ²⁷ Ng'entaama owegiwulisisya eigono
ly'omuliisya waagyo, abantu ibo abange bona
niye owebawulisisya ebibono byange. Nze abo
nago mbamaite, era bansengererya. ²⁸ Abo
mbawa obwomi obutawaawo, era tibalijigirika
naire. Era mpaawo ayezya okubannyagulaku

omu ngalo. ²⁹ OBbaabba eyabampaire, iye akira bonabona obwezye, kale mpaawo ayezya okubanyagula omu ngalo gya Bbaabba. ³⁰ Ekyo kityo olwakubba nze n'oBbaabba tuli kimo."

³¹ Awo abeekubbemberi b'aBayudaaya tete ni bakwata amabbaale okutaka okwita oYesu. ³² Neye iye n'abakoba ati, "Muboine ebyewunyo bingi ebinkolere oBbaabba ebiyankobere okukola. Olwo kiri yaina kwebyo ekimusinziriraku okutaka okunkubba amabbaale?"

³³ Ibo ni bamwiramu bati, "Mpaawo kwebyo ekitusinziriraku okutaka okukukubba amabbaale, neye lwa kuzumirira Kibbumba olwakubba iwe omuntu-obuntu, weeyeta okubba Kibbumba."

³⁴ OYesu n'abairamu ati, "Tibakiwandiikire omu Mateeka gaanywe bati oKibbumba yakobere ati, 'Muli bakibbumba.' ³⁵ Era mumaite muti eBiwandiike tibezya okubivunawo. Kale obanga abantu abasunire obukwenda bwa Kibbumba, yabeetere 'bakibbumba,' ³⁶ kaisi leero oodi iye oBbaabba oguyatukwirye era n'amutuma n'oku kyalo? Aale inywe lwaki munvunaana olw'ekizumi, nze olwakubba nkobere nti, 'Ndi Mwana wa Kibbumba?' ³⁷ Mwanningaine lw'okutakola Bbaabba ebyakola. ³⁸ Neye owembikola, newankubbaire mungaana, aale mwikiriryeku ebyamagero, kaisi mumanye era mutegeere muti oBbaabba ali n'enkolagana na nze era zena

ndi n'enkolagana n'oBbaabba." ³⁹ Era awo ni bagezyaku tete okumukwata, neye n'ababunuka.

⁴⁰ Awo, oluzwanyuma oYesu n'asalamu omwiga oYoludaani n'akanga omu kifo oYokaana egiyabbaireku omu naku gy'enyumaku ng'abatiza. Nabbaaku eeyo, ⁴¹ era abantu bangi ni baabanga egyali, nga bakoba bati, "Waire oYokaana tiyakolereku akamanyiciryo k'ekywunyo, neye byonabyona ebijatumwire oku musaiza onu, by'amazima." ⁴² Era omu kifo ekyo bangi ni bamwikiririryamu.

11

Okufa kwa Lazaalo

¹ Lumo omusaiza ogubeeta oLazaalo, ow'oku kyalo ky'e Bbesaniya, yabbaire mulwaire. Era aboonyokobe, oMalyamu n'oMaliza bona babbaire batyami b'oku kyalo ekyo. ² OMalyamu oyo, omwonyoko wa Lazaalo eyabbaire omulwaire niiye onyere oyo oluzwanyuma eyasiigire oMusengwa amafuta agakaloosa oku bigere, era n'abisiimuula n'enziiri gy'okumutwegwe. ³ Kale abakali abo abaganda, ni baweererya oYesu obukwenda bati, "Musengwa, omukaagwawo ogwotaka eino mulwaire."

⁴ Neye oYesu oweyakiwuliire, n'akoba ati, "Obulwaire obwo tibwamuzweremu kufa kadi. Wazira kigendereire kugulumalya Kibbumba, era kaisi oMwana wa Kibbumba bamugulumalye okubita mwekyo." ⁵ Kiri nti oYesu yabbaire ataka

ino oMaliza n'omugandawe n'oLazaalo. ⁶ Neye aate oweyawuliire ati oLazaalo mulwaire, tete n'asigalayo egiyabbaire enaku egindi ibiri.

⁷ Oluzwanyuma n'akoba abeegibe ati, "Tukange e Buyudaaya."

⁸ Neye abeegibe ni bamukoba bati, "Musomesya, eizuuli bunu aBayudaaya babbaire bataka okukukubba amabbaale, tete eeyo gyotaka okukanga?"

⁹ OYesu n'abairamu ati, "Esaawa egy'omusana tigibba ikumi na ibiri? Iye omuntu atambula omusana tiyeesitaala olwakubba abba atambulira mu kitangaala ekyaka oku kyalo kunu.

¹⁰ Neye omuntu atambula obwire, niiye eyesitaala olwakubba abba adamba ekitangaala mwiye." ¹¹ Awo oweyamalire okutumula ebyo, n'abakobera ati, "Omukaagwa waiswe oLazaalo agonere, neye njabayo okumulamuca."

¹² Abeegi ni bamukoba bati, "Musengwa, abba agonere, yalamuka." ¹³ Cooka oYesu iye yabbaire atumula ku kufa kwa Lazaalo, neye abeegibe ni baseega bati ateggeeza kugona ndoolo.

¹⁴ Kale awo n'abakobera lwatu ati, "OLazaalo afiire, ¹⁵ era okulwanywe nsangaire olwakubba timbaireyo, kaisi oolwo mwezye okunjikiririyamu. Aale atyanu twabeyo egyali."

¹⁶ Awo oTomasi ogubeeta "oMulongo," n'akoba abeegi abainaye ati, "Swena oleke twabe tufeere aamo n'oMusengwa."

Iye azuukiza era agaba obwomi

¹⁷ OYesu oweyabbaire yatira okutuuka e Bbesaniya, n'amanyica ati oLazaalo amalire

enaku ina omu magombe. ¹⁸ E Bbesaniya kyabbaire kumpi n'e Yerusaalemi, era wabbairewo ekiromita ooti isatu. ¹⁹ Era aBayudaaya bangi okuzwa e Yerusaalemi, babbaire baabire okubona oMaliza n'oMalyamu olw'okufiirwa omwonyoko waabwe.

²⁰ Awo oMaliza oweyawuliire ati oYesu ali kwabayo, n'ayaba okumwaniriza, neye oMalyamu iye n'asigala ika. ²¹ OMaliza oweyasan-gaine oYesu, n'akoba oYesu ati, "Musengwa aale singa wabbairewo, omwonyoko wange tiyankafi-ire! ²² Neye mmaite nti atyanu, buli ekiwasaba oKibbumba, yakukolera."

²³ OYesu n'amukoba ati, "OMwonyokowo ayaba okuzuukira."

²⁴ OMaliza n'amwiramumu ati, "Mmaite nti yalizuukira omu kuzuukira okw'olunaku olw'enkomerero."

²⁵ OYesu n'amukoba ati, "Ninze azuukiza, era agaba obwomi obutawaawo. Buli anjikiririryamu, n'owaafa, tete yalibba mwomi.

²⁶ Era buli muntu omwomi era anjikiririryamu, tiyalifa emirembe n'emirembe. Ekyo oki-ikirirya?"

²⁷ Iye n'amwiramumu ati, "Niikyo Musengwa, njikirirya nti niuwe oKurisito oMwana wa Kibbumba, oguyasukireku amafuta. Era niuwe oyo eyabbaire n'okwiza oku kyalo."

OYesu akunga amaliga

²⁸ Era oMaliza oweyamalire okutumula ebyo, n'akanga e ika, n'airya omugandawe oMalyamu oku mbale, n'amukoba kyama ati, "OMusomesya

aizire, era akubuulya.” ²⁹ OMalyamu oweyawuli-
ire ekyo, n’asetuka mangu, n’ayaba okwaniriza
oYesu. ³⁰ Awo oYesu yabbaire akaali okwingira
omu kitundu ekyo, neye ng’akaali ali mu kitundu
oMaliza ekiyamwajiiryemu.

³¹ Awo aBayudaaya ababbaire n’oMalyamu
omu nyumba nga baizire okubabona, owe-
baboine ng’asetukire mangu n’awuluka, ni ba-
musenjaaku. Babbaire baseega bati demba
n’abba ng’ayaba ku magombe kukunga.

³² Awo oMalyamu oweyatuukireyo, era
n’abona oYesu, n’akoma amazwi okumpi
n’ebigerebye, n’amukoba ati, “Musengwa,
aale singa wabbairewo, omwonyoko wange
tiyankafiire!”

³³ OYesu oweyaboine oMalyamu ng’akunga,
n’aBayudaaya ababbaire baabire n’oMalyamu
bona nga bakunga, n’alumwa omu mwoyogwe,
era ni kimuteganya ino. ³⁴ Awo n’ababuulya
ati, “Mwamuliikire yaina?” Ni bamukoba bati,
“Musengwa, oize twabeyo obone.”

³⁵ OYesu n’akunga. ³⁶ Awo aBayudaaya ni
bakoba bati, “Mubone ng’owaabbaire amutaka!”

³⁷ Neye abamo kwibo ni bakoba bati,
“Onu eyalamirye amaiso g’omusaiza omwofu,
tiyandibbaireku n’ekyakola oLazaalo nandi
nafa?”

OYesu azuukiza oLazaalo

³⁸ Awo oYesu tete n’airamu okulumwa omu
mwoyogwe, n’atuuka oku magombe ga Laza-
alo. Era gabbaire magombe ag’empuku, nga
baigairewo omulyango n’eibbaale. ³⁹ OYesu

n'akoba ati, "Mutoolewo eibbaale." OMaliza omwonyoko w'omufu, n'akoba oYesu ati, "Neye, Musengwa, atyanu afunya olwakubba amaliremu enaku ina!"

⁴⁰ Awo oYesu n'amukoba ati, "Tinkukobere nti owewaikirirya, wabona ekitiisya kya Kibumba?"

⁴¹ Kale ni batoolawo eibbaale. OYesu n'alingirira omwigulu era n'akoba ati, "Bbaabba, nkwebalya olwakubba ompuliire. ⁴² Nze mmaite nti ompulira buliijo, neye ntumwire ekyo olw'okugasa abantu abeemereire aanu, kaisi beezye okwikirirya bati wantumire."

⁴³ Oweyamalire okutumula ebyo, n'ayeta n'eigono ery'amaani ati, "Lazaalo, owuluke!"

⁴⁴ Era eyabbaire omufu nago n'azwayo ng'engoye gikaali mbiringe oku bigerebye n'amangaloge, era nga n'ekiwero kikaali kisibe omu maisoge.

OYesu n'abakoba ati, "Mumusindibuleku engegye egyo, era mumuleke atambule."

Olukwe lw'okwita oYesu

(Mat 26:1-5; Mak 14:1-2; Luk 22:1-2)

⁴⁵ N'olwekyo bangi oku Bayudaaya ababbaire baabire okubona oMalyamu, era ni babona oYesu ekiyakorere, ni bamwikiririyamu.

⁴⁶ Neye abamo kwibo ni baaba giri Bafalisaayo, era ni babakobera oYesu ekiyakorere.

⁴⁷ Kale abakabona abakulu n'aBafalisaayo ni batyamisya oLukiiko oLufugi olw'aBayudaaya, ni beebuulya bati, "Tukole tutya? Omusaiza ngonu ali kukolanga obumanyiciryo bw'ebywunyo bungu. ⁴⁸ Singa owetumuleka

ng'akola ebintu ebyo, abantu bonabona baaba kumwikiririryamu. Era n'aBalooma baliiza ni bajigirica eYeekaalu yaiswe n'eigwanga lyaiswe!"

⁴⁹ Awo omoiza kwibo, eriina bati Kayaafa, eyabbaire okabona akira obukulu omu mwanka ogwo, n'atumula ino ati, "Inywe mpaawo kimutegeera oku biri kubbangawo!
⁵⁰ Timumaite muti kibagasa omusaiza omoiza okufeererera abantu, okukiraku eigwanga eribbeereri okujigirika?"

⁵¹ Ekyo tiyakitumwire kululwe, wazira nga iye okabona akira obukulu omu mwanka ogwo, yawaire bunaabbi ati oYesu wakufeererera eigwanga ly'aBayudaaya. ⁵² Era nga tiwakufeererera Bayudaaya bonkani, neye n'abalondemu ba Kibbumba abandi aBatali Bayudaaya abali omu byalo ebindi, okubairya aamo babbe kimo. ⁵³ Kale okuzwa oku lunaku oolwo abeekubemberi b'aBayudaaya ni basala olukwe okwita oYesu.

⁵⁴ N'olwekyo oYesu n'alekeraawo okutambulira omu Bayudaaya omu lwatu. Neye n'azwayo, n'ayaba mu kifo ekiriraine ekitera oku kyalo ekibeeta Efulaimu, n'abba eeyo n'abeegibe.

⁵⁵ Awo oMukolo ogw'aBayudaaya ogw'oKutambukirya owegwabbaire gwatira okutuuka, abantu bangi ni bazwa omu byalo, ni baaba e Yerusaalemi. Baabire kukola mukolo gwabwe ogw'okwetukulya, ng'oMukolo ogw'oKutambukirya gukaali okutuuka. ⁵⁶ Kale eeyo ni babba omukunoonia oYesu. Era owebabbaire nga beemereire omu luuga

lw'eYeekaalu, ni beebuulyangana bati, "Museega mutya? Tiyaizeku oku Mukolo naire?" ⁵⁷ Ekyo kyabbaire kityo olwakubba abakabona abakulu n'aBafalisaayo babbaire balagiire bati singa wabbaawo amanyica oYesu egyali, abakobere kaisi beeye okumukwata.

12

*OYesu bamusukaku amafuta e Bbesaniya
(Mat 26:6-13; Mak 14:3-9)*

¹ Owewabbaire nga wabulayo enaku mukaaga, oMukolo ogw'oKutambukirya gutuuke, oYesu n'atuuka oku kyalo ky'e Bbesaniya. OLazaalo yabbaire mutyami w'oku kyalo okwo era niiye oyo oYesu oguyazuukizire. ² Kale eeyo oYesu ni bamutegekera ekyeigolo, era oMaliza n'abainula. Era oLazaalo yabbaire moiza kwabo abaliire oku menza n'oYesu.

³ Kale awo oMalyamu n'akwata ecupa* erimu amafuta amakengeize ag'akaloosa, era ag'ebbeeyi eino agebeeta naludo. Awo n'agasuka oku bigere bya Yesu, era n'abisiimuula n'enziiri gy'okumutwegwe. Era enyumba n'eizula akaloosa ak'amafula ago.

⁴ Neye oYuda oIsikalyoti, era omoiza oku beegi ba Yesu, eyabbaire ayaba okumulyamu olukwe, n'akoba ababbairewo ati, ⁵ "Kale lwaki amafuta ago tibagatundiremu edinaali 300, era empiaa egyo ni bagigabira abadoobi?" ⁶ OYuda yatumwire ekyo tirwakubba nti yabbaire alu-mirwa abadoobi, neye olwakubba yabbaire

* **12:3** 12:3 Cupa omu Luyonaani kiri, Litera. **12:3** 12:3 Luk 7:37-38

mwibbi. Era ng'owekeyabbaire kiti niiye eyabbaire omuwanika waabwe, iye yaibbangaku egimo.

⁷ Awo oYesu n'airamu ati, "OMalyamu mu-muleke olwakubba kyabbaire kigenderere kiti yabbaire ali n'okubisa amafuta ago kugakolesya ku lunaku olubalindiikiraku. ⁸ Ekyo kityo olwakubba abadoobi ibo baabbanga na inywe buliijo, neye nze tinaabbe na inywe okumala ekiseera ekinene."

Olukwe olw'okwita oLazaalo

⁹ Awo ekiyindi kinene eky'aBayudaaya, ni kitegeera kiti oYesu ali e Bbesaniya. Kale ni baabayoy, tirwakubona Yesu kyonkani, neye n'okubona oLazaalo, oYesu oguyazuukizire. ¹⁰ Kale awo abakabona abakulu ni basala amalabuki okwita oLazaalo yena. ¹¹ Ekyo kyabbaire kityo olwakubba okulwa Lazaalo, aBayudaaya bangi bazwanga oku bakabona abakulu ni baaba egiri oYesu, era ni bamwikiririyamu.

*OYesu bamwaniriza omu kitiisya eky'amaani
(Mat 21:1-11; Mak 11:1-11; Luk 19:28-40)*

¹² Oku lunaku olwairireku, ekiziima kinene eky'abantu ababbaire baabire e Yersaalemi oku Mukolo ogw'oKutambukirya, ni bawulira bati oYesu ali kwabayoy. ¹³ Awo ni bakwata ensansa egitali nkujuulye, era ni baaba okumwaniriza nga webaceera bati,
"Tuwuuje oMusengwa oKibbumba!

W'enkabi oyo iye aiza omu liina lya Musengwa
oKibbumba!

Tumuwuuje iye oyo oKabaka wa Isirairi.”

¹⁴ Awo oYesu n'asuna ompunda omutomuto,
n'atyamaku okutuukirirya eKiwandiike ekiti,

¹⁵ “Inywe abantu b'e Sayuuni timwatya.

Aale mubone oKabaka waanywe aiza,
ng'atyaimbe oku mpunda omutomuto.”

¹⁶ Omu kiseera ekyo abeegibe tibategeire
ebintu ebyo, neye oKibbumba oweyamalire
okugulumalya oYesu ng'amuzuukiza, kaisi ni
beewukirya ng'ebyo byabbaire bityo ng'owekiri
omu Biwandiike by'abanaabbi.

¹⁷ Ekiziima ky'abantu ekyabbairewo ng'oYesu
ayeta oLazaalo okuzwa omu magombe era
n'amuzuukiza, ni beeyongera okukobera abantu
abandi ebyabbairewo. ¹⁸ N'olwekyo abantu
bangi, olwakubba babbaire bawuliire bati yab-
baire akolere akamanyiciryo k'ekywunyo kanu,
ni baabayokumusangaana ¹⁹ Kale aBafalisaayo
ni bakobangana bati, “Kimanye kusani nti
mpaawo kitwezya okukola. Aale mubone buli
muntu amusengererya!”

ABayonaani abataka okutumula n'oYesu

²⁰ Atyanu abamo oku Bayonaani
babbaire bamo oku bantu abaabire e
Yerusaalemi okusinza oKibbumba oku Mukolo
ogw'oKutambukirya. ²¹ Kale aBayonaani abo
owebatuukire eeyo ni baaba egiri oFiripo
ow'oku kyalo ky'e Bbesusaida eky'omwitwale
ly'e Galiraaya, ni bamusaba bati, “Sebo tutaka

okutumulaku n’oYesu.” ²² Awo oFiripo n’ayaba n’akoba Andereya kaisi bonabona ni baaba okukobera oYesu.

²³ Iye oYesu n’abairamu ati, “Ekiseera kituukire oKibbumba okugulumalya oMwana wa Muntu. ²⁴ Era mbakobera amazima nti onsigo owaatagwa omwitakali era ni bamuliika, asigala denge. Neye owebamuliika amera n’abala empeke nyingi. ²⁵ Buli agezyaku okulamya obwomibwe okululwe, yalibufirwa, neye buli acaawa obwomibwe okulwange ng’ali oku kyalo kunu, yalisuna obwomi obutawaawo. ²⁶ Era oyo iye ampeererya, atekwa okubba aikiriirye okugumira nze ebinjaba okubitamu, kaisi oolwo eginaaba eeyo omwigulu yena beezye okumutu-ucaayo. Kale oBbaabba yaliwa ekitiisya iye oyo ampeererya.”

OYesu atumula oku kufaakwe

²⁷ Awo oYesu ni yeeyongera ati, “Atyanu omwoyo gwange gweraliikiriire, era timmaite n’ekyokukoba. Nkobe nti, ‘Bbaabba toganya akaseera akagosi ako ak’okugada n’okufa okuntuukaku?’ Bbe, olwakubba ekyandetere niikyo nze omu kaseera kanu okubita omu kugada! ²⁸ Aale Bbaabba ogulumalye eriinalyo.” Awo eigono ni lizwa omwigulu erikoba liti, “Naligulumairye era nalirigulumalya tete.”

²⁹ Ikyo ekiziima ky’abantu ekyabbaire kye-mereire awo owebawuliire, abamo ni bakoba bati, “Laadu niyo ebbwatuka!” Abandi ni bakoba bati, “Omalaika atumwire naye.”

³⁰ Awo oYesu n’abakoba ati, “Eigono eeryo erimuwuliire tiriizire kugasa ninze, wazira kugasa niinywe. ³¹ Era atyanu oKibbumba ayaba okusalira ekyalo omusango. N’omu kiseera kinu iye oSitaani omufugi w’ekyalo kinu, oKibbumba ayaba okumuwambaku obufugi. ³² Neye nze owebalinjanika oku musalabba, nalikuusa abantu bonabona ni babba bange.” ³³ Ekyo yakitumwire, ng’ategeeza enfa egiyabbaire ayaba okufaamu.

³⁴ Awo ekiziima ky’abantu ni kiceera nga bakoba bati, “Iswe tumaite tuti eBiwandiike bikoba biti oKurisito ogubasukireku amafuta wa kubbaawo emirembe n’emirembe. Olwo tete iwe okoba otya oti oMwana wa Muntu bateekwa okumwanika oku musalabba? Iwe otumula ku Mwana wa Muntu aliina oyo?”

³⁵ Awo oYesu n’abakoba ati, “Mwaba okweyongera okubbaaku n’ekitangaala ekiseera kitono. Kale mutambule nga kikaali kiriwo, ng’endikiirya ekaali okubazingiza olwakubba atambulira omu ndikiirya tabona e gyayaba.

³⁶ Kale mwikiririryemu omu kitangaala nga kikaali kiriwo, kaisi mwezye okubba bantu b’ekitangaala.” OYesu oweyamalire okutumula ebyo n’azwawo era ni yebeebisaku.

ABayudaaya beeyongera n’obutaikirirya

³⁷ Awo oYesu n’oweyamalire okukola obumanyiciryo bw’ebyewunyo obwo bwonabwona nga babona, era aBayudaaya tibamwikiririryemu. ³⁸ Ekyo kyabbaire kityo

lw'okutuukirirya kibono kya Isaaya onaabbi, ekiti:

“Musengwa Kibbumba, naani aikiriirye obukwenda bwaiswe era naani ogubabiikuliire obwezye bwa Musengwa?”

³⁹ Ekyo niikyo ekyagirire ni batezya okwikirirya, olwakubba oIsaaya era yakobeire awandi ati:

⁴⁰ “OKibbumba yaboofuwairye era n'abakakanyalya emyoyo, kale tibeezya kadi kubona n'amaiso gaabwe ag'omwoyo, waire kutegeera, waire kucuuka ni baira egyendi omu myoyo gyabwe, era ni mbalokola.”

⁴¹ Ebyo oIsaaya yabitungwire olwakubba yaboine ekitiisya kya Yesu, era oIsaaya n'amutumulaku.

⁴² Cooka era omu kiseera ekinyere ekyo bangi oku beekubbemberi b'aBayudaaya bamwikiririyemu. Neye olw'okutya aBafalisaayo, tibakibbutwire nga baseega bati demba ni bababbinga omwikumbaaniro. ⁴³ Ekyo kityo olwakubba batakirire bantu okubawuuja okukiraku oKibbumba iye okubawuuja.

⁴⁴ Awo oYesu n'alangirira ati, “Omuntu owanjikiririryamu tabba anjikiririryamu ninze zenkani, wazira abba aikiririrya n'omu Kibbumba eyantumire. ⁴⁵ Era omuntu oyo owambonaku, abba ooti aboine Kibbumba eyantumire. ⁴⁶ Nze naizire oku kyalo ng'ekitangaala,

kaisi buli anjikiririryamu, tiyasigala omu ndiki-irya.”

⁴⁷ Awo oYesu ni yeeyongera ati, “Iye omuntu awulira ebibono byange kaisi n’atabikwata, timmusalira omusango. Ekyo kityo olwakubba tinaizire kusalira bantu misango, wazira kubalokola. ⁴⁸ Neye iye oyo angaana era ataikirirya ebibono byange, oKibbumba yalimusingisya omusango oku lunaku lw’enkomerero ng’asinzirira ku bibono ebyo ebinatumwire. ⁴⁹ Ekyo kityo olwakubba tinabitumulanga kulwange, neye oBbaabba eyantumire niye eyandagiire ebyokutumula, n’engeri y’okubitumulamu. ⁵⁰ Era mmaite nti omukugondera ekiragiroke kizweramu omuntu okusuna obwomi obutawaawo. Kale buli ekintumula kibba kinanyerenyeere kidi oBbaabba ekiyankobere okutumula.”

13

OYesu anaabya abeegibe ebigere

¹ Awo eizo waaku lwabbaire lwabba lunaku lw’oMukolo ogw’oKutambukirya. Iye oYesu yategeire ati ekiseerakye ekyokuzwa oku kyalo kunu okukanga egiri oIteeye kituukire. Neye ibo abeegibe babbaire baaba okusigala oku kyalo kunu. Era oYesu yabbaire ataka ino abeegibe kale awo n’abalaga ng’owabataka omu bwizulye.

² Kale omu kiseera oYesu n’abeegibe ekibabbereire aamo oku kyeigolo, oSitaani yabbaire amalire okuteeka omu mwoyo gwa Yuda oIsikalyoti omutaane wa Simooni ekiseego ky’okulyamu oYesu olukwe. ³ Neye iye oYesu

yabbaire akimaite kusani ati oTeeye yamuwaire obwezye oku bintu byonabyona. Era yabbaire akimaite ati yazwire giri Kibbumba, era ati yatira okukanga egiri oKibbumba.

⁴ Kale awo n'asetuka n'azwa oku kiinulo, ni yeetoolamu ekizibaawokye, kaisi n'akwata etawulo ni yeesiba omu nkende. ⁵ Oluzwanyuma lw'ekyo n'asuka amaizi omu kalaayi kaisi n'atandiika okunaabya abeegibe ebigere. Yabinaabyanga neenu wabisiimuula n'etawulo egiyabbaire yeesibire.

⁶ Awo n'atuuka oku Simooni oPeetero, kaisi iye n'amukoba ati, "Musengwa, oyaba kunnaabya bigere?"

⁷ OYesu n'amwiramumu ati, "Iwe totegeera ekindi kukola esaawa eenu, neye oluzwanyuma walikitegeera."

⁸ Awo oPeetero n'amwiramumu ati, "Musengwa nze tinaliikiriryaku iwe okunnaabya ebigere." Cooka oYesu n'amwiramumu ati, "Owentakunaabya ebigere, obba toli kimo na nze."

⁹ Awo oSimooni Peetero n'amukoba ati, "Musengwa, aale nga kityo tiwannaabyaku bigere byonkani, neye onnaabye paka n'amangalo n'omutwe gwona!"

¹⁰ Kale oYesu n'amukoba ati, "Iye omuntu owaabba ng'abbaire amalire okunaaba omubiri gwonagwona, iye oyo abba yeetaaga kunaabaku bigere byonkani. Igwo omubiri gubba gutukwire. Aate era inywe muli batukulye, okutoolaku omoiza kwinywe." ¹¹ Yakobere atyo olwakubba iye yabbaire amaite ayaba okumulyamu olukwe,

era niikyo ekyagirire n'akoba ati batukulye oku-toolaku omoiza kwibo.

¹² Kale oYesu oweyamalire okunaabya abeegibe ebigere, tete n'azwala ekizibaawokye era n'akanga n'atyama oku kiinulo. Awo n'ababuulya ati, "Mutegeera amakulu g'ekyo ekinkolere?" ¹³ Inywe munjeta 'Musomesya' era muti, 'Musengwa,' era ekimutumula kituuce olwakubba ekyo niikyo ekyendi. ¹⁴ Aale atyanu nze, oMusengwa waanywe era oMusomesya waanywe ng'owemmalire okubanaabya ebigere, na inywe nywena muli n'okunaabyangananga ebigere. ¹⁵ Nze mbateekeirewo ekyokuboneraku ekimuli n'okukola ng'owembakoleire. ¹⁶ Mbakobera amazima nti mpaawo mugalama abba w'ekitiisya okukiraku omusengwawe, waire mukwenda tabba w'ekitiisya okukiraku amutumire. ¹⁷ Atyanu ng'owemumaite ebintu ebyo, mwabba n'enkabi owemwabikolanga."

OYesu alagula oku kumulyamu olukwe

(Mat 26:20-25; Mak 14:17-21; Luk 22:21-23)

¹⁸ Awo oYesu ni yeeyongera ati, "Tindi kutumulanga ku niinywe nywenanywena, nze mmaite abantu abenalonderemu, ikyo ekibali. Neye ekyo kyokutuukirirya Kiwandiike, ekikoba kiti, 'Oyo ogundya naye ayaba okundyamu olukwe.' ¹⁹ Nze ndi kubakobera oku kintu ekyo atyanu nga kikaali okubbaawo, kaisi oolwo owekyalimala okubbaawo, mwezye okwikirirya muti ninze oyo

ng'owenetumulaku. ²⁰ Era mbakobera amazima nti asangaalira buli oguntuma, abba asangaaliire ninze, era buli ansangaalira, abba asangaaliire Kibbumba oyo eyantumire.”

²¹ Kale awo oYesu oweyamalire okutumula ebyo, ni yeeraliikirira ino omu mwoyogwe, n'abbutula ati, “Mbakobera amazima, omoiza kwinywe ayaba okundyamu olukwe.”

²² Awo abeegibe ni balolanganaku, neye ni bibasobera olw'okutamanya oguyabbaire atumulaku. ²³ Iye omoiza oku beegi, oYesu oguyabbaire ataka eino, yabbaire atyaime kumpi n'oYesu. ²⁴ Kaisi awo oSimooni Peetero n'agererya omwegi oyo nago ng'amukoba ati, “Obuulye oYesu atukobere ogwatumulaku.”

²⁵ Kale awo omwegi oyo nago eyabbaire atyaime okumpi n'oYesu, n'amweigikaku omu kifubba katonu kaisi n'amubuulya ati, “Musengwa, naani oyo ogwotumulaku?”

²⁶ Iye oYesu n'amwiramumu ati, “Niiye oyo ogunaawa ekimegero kinu ekinaabba nkozerye omu syodo.” Era oYesu n'akozya ekimegero, kaisi n'akiwa oYuda oIsikalyoti omutaane wa Simooni. ²⁷ Era oYuda oweyamalire okulya ekimegero ekyo, amangu ago oSitaani n'amwingiramumu.

Awo oYesu n'amukoba ati, “Ekiwatira okukola, okikole mangu!” ²⁸ Neye ku bonabona ababbaire awo oku kiinulo, mpaawo kadi moiza eyategeire ekyazwireku oYesu n'akoba atyo oYuda. ²⁹ Neye

abamo ni baseega bati oYuda ng'oweyabbaire niye omuwanika, oYesu ayezya okubba amutuma kugula bintu by'oku Mukolo, ooba amukoba kugabiraku badoobi mpiiya.

³⁰ Kale oYuda oweyamalire okulya ekimegero ekyo, amangu ago n'awuluka. Era omu kiseera ekyo omu mwoyogwe mwabbaire mwizwire endikiirya nga n'obwire bwirugaire.

Ekiragiro ekiyaaka

³¹ Kale awo oYuda oweyamalire okuwuluka okwaba, awo oYesu n'akoba abeegibe ababbaire basigaire awo ati, "Atyanu oMwana wa Muntu oKibbumba amugulumairye, era okubita omu Mwana nago abantu bagulumairye oKibbumba.

³² Kaisi obanga oKibbumba bamugulumairye kubita mu niye, era n'oKibbumba yagulumalya oMwana wa Muntu mangu ago. ³³ Baana bange, naabba na inywe akaseera katono. Mwalinnoonia, era nakimo ng'owenakobere aBayudaaya, n'atyanu niikyo ekimbakobera nti, 'Inywe timwezya okutuuka eginjaba.' "

³⁴ Awo oYesu ni yeeyongera ati, "Cooka mbawa ekiragiro ekiyaaka nti, mutakanganenge. Nga nze owembataka, mutyo na inywe wemuteekwa okutakangananga. ³⁵ Singa owemwabbanga n'okutakangananga, awo abantu bonabona bamanyicanga bati muli beegi bange."

OYesu alanga ati oPeetero yamwegaana (Mat 26:31-35; Mak 14:27-31; Luk 22:31-34)

³⁶ Awo oSimooni Peetero n’abuulya oYesu ati, “Musengwa, oli kwaba yaina?”

OYesu n’amwiramumu ati, “Omu kiseera kinu toyezya okwabayo na nze, neye oluzwanyuma waliizayo.”

³⁷ Tete oPeetero n’amubuulya ati, “Musengwa, lwaki timpezya okwaba na iwe atyanu? Ndi mutegeki okukufeerera.”

³⁸ Awo oYesu n’amwiramumu ati, “Iwe dala oli mutegeki okunfeererera? Nkukobera amazima nti, onkoko yaabba akaali n’okukookoola nga wankanegaanira emirundi misatu ng’okoba oti tommaite.”

14

Enzira n’obwomi n’amazima

¹ Awo oYesu n’akoba ati, “Timweraliikiriranga. Inywe mwikiririrye mu Kibbumba, era na nze zena munjikiririyemu. ² Omu nyumba ya Bbaabba mulimu ebisenge bingi, era njaba okubategekera ekifo. Singa ekyo tikibbaire kituuce, tinandibakobere nti njabayo okubategekera ekifo. ³ Era owenalimala okubategekera ekifo, naliira ni mbatwala ni mubbanga na nze kaisi nywena ni mubbanga eeyo eginallibba. ⁴ Era mumaite enzira etuuka eginjaba.”

⁵ Awo oTomasi n’amukoba ati, “Musengwa titumaite egyoyaba, kale twamanya tutya enzira eyabayo?”

⁶ Awo oYesu n’amwiramumu ati, “Ninze enzira eyaba e wa Kibbumba, era ninze mmanyikisya abantu amazima agakwata oku oKibbumba, era ninze agaba obwomi obutawaawo. Mpaawo

atuuka egiri oBbaabba okutoolaku ng'abitire mu ninze. ⁷ Singa nze muntegeera, n'oBbaabba yena mwandimutegeire.* Era okuzwa olwatyanu muntegeire era muli ng'abamuboiniku.”

⁸ Awo oFiripo n'amukoba ati, “Musengwa, otulagisye oIteewo era ekyo kyatumala.”

⁹ Iye oYesu n'amwiramumu ati, “Kasookeede mba na inywe ekiseera ekyo kyonakyona, Firipo tontegeeranga? Obanga buli muntu ambonaku, abba ng'aboine oku Bbaabba. Tete obba otya okunkoba oti, 'Otulagisye oIteewo?’

¹⁰ Iwe toikirirya oti nze ndi bumo n'oBbaabba, era n'oBbaabba ali bumo na nze? Ebi-bono ebimbakobera inywe, tibyange-kubwange. Neye oBbaabba iye aali obumo na nze, niye akola ng'owaataka ng'abita mwebyo ebinkola n'ebintumula.”

¹¹ Awo oYesu ni yeeyongera okukoba ati, “Aale mwikirirye ebimbakobera nti nze ndi bumo n'oBbaabba era n'oBbaabba ali bumo na nze. Aale owemubbanga timwikirirya ebintumula, mwikirirye olw'ebyewunyo ebinkola waire byonkani.” ¹² Mbakobera amazima nti buli anjikiririyamu, yalikola ebyewunyo ooti biibyo ebinkolanga, era yalikola n'ebikiraku ebyo olwakubba njaba egiri oBbaabba. ¹³ Era buli ekimwasabanga nga mubita omu liina lyange, nakibakoleranga, kaisi oBbaabba bamuguluma-lye nga babita omu Mwanawe. ¹⁴ Era buli owemwansabanga ekintu kyonakyona nga mubita omu liina lyange, nakikolanga.

* **14:7** 14:7 Ooba, Owemubba dala nga muntegeire, oBbaabba yena mwalimutegeera.

OYesu asubiza oMwoyo oMweru

¹⁵ Awo oYesu ni yeeyongera okutumula nabo ati, “Owemubbanga muntaka, mwakwatanga ebiragiro byange. ¹⁶ Era nalisaba oBbaabba n’abawa oMubbeeri ogondi, iye etiyalibaleka emirembe n’emirembe. ¹⁷ OMwoyo nago niiye amanyikisya abantu amazima agakwata oku Kibbumba. Cooka ibo abataikiririrya omu Kibbumba tibeezya okwikirirya Mwoyo nago olwakubba tibamutegeera, era tibamumaite. Neye inywe mumumaite olwakubba abba na inywe, era yatyamanga omu myoyo gyanywe. ¹⁸ Era tinalibalekawo okubba ooti bafuubbi olwakubba owemwalisuna oMwoyo nago kyalibba ooti ninze njirire egimuli. ¹⁹ Omu kiseera kitono kiti, ibo abataikiririrya omu Kibbumba baabbanga tibakaali bambona, neye inywe mwalimbona olwakubba tete nalibba mwomi, era nywena mwalibba boomi. ²⁰ Era oku lunaku oolwo tete olumwalimboneraku nga mmalire okuzuukira mwalitegeera muti nze ndi bumo n’oBbaabba, era muti nywena muli bumo na nze, era tete muti nze ndi bumo na inywe. ²¹ Buli awulira ebiragiro byange n’abikwata, oyo niiye antaka. Era oBbaabba yatakanga oyo antaka, zena natakanga omuntu oyo, era namubiikuliranga ikyo ekyendi.”

²² Kale awo oYuda, neye nga tiyoodi oIsikalyoti, n’amubuulya ati, “Neye Musengwa, lwaki ogenderera kutubiikulira niiswe tumanye ikyo ekyoli, kaisi nandi n’obiikulira ibo abantu abandi oku kyalo?”

²³ OYesu n’amwiramumu ati, “Omuntu yenayena

antaka, yakwatanga ebibono byange ebimukoba. N’olwekyo oBbaabba yamutakanga era nze n’oBbaabba twaizanga egyali ni tubbanga aamo naye. ²⁴ Iye oyo atantaka, takwata ebibono ebyo aate ng’ebibono nago ebyembakobera tibyanage, wazira bya Bbaabba era eyantumire.”

²⁵ OYesu ni yeeyongera okukoba ati, “Mbakobeire ebyo byonabyona nga nkaali ndi na inywe. ²⁶ Neye oMubbeeri, iye oMwoyo oMweru oyo oBbaabba oguyalituma omu kigere kyange, yalibeegesya byonabyona era yalibeewukirya byonabyona ebimbakobeire. ²⁷ Aale atyanu mbalekera eidembe, era mbawa eidembe eryange. Iryo erimbawa tiriwaawo, era tiriri ooti liiryo abantu eribasuna oku kyalo. N’olwekyo timweraliikiriranga era timwatyanga olw’ebyabbangawo.”

²⁸ Awo oYesu ni yeeyongera ati, “Muwuliire nga mbakobera nti ‘njaba, neye naira egimuli.’ Aale singa mubbaire muntaka, mwandisangaire nze okwaba egiri oBbaabba olwakubba iye ankiraku ekitiisya. ²⁹ Ebyo mbibakobeire atyanu nga bikaali okubbaawo, kaisi owebyalimala okubbaawo mwezye okunjikiririryamu. ³⁰ Cooka tineeyongere okutumula na inywe olwakubba oSitaani omufugi w’ekyalo kinu aiza okunnumba. Neye abula obwezye kwebyo ebintuukaku. ³¹ Wazira, ibo abantu abatali ba Kibbumba bateekwa okumanya okusinzirira kwebyo ebintuukaku bati ntaka oBbaabba. Era bati ndi kukolanga biidi oBbaabba ebiyandagiire.”

Awo n'amaliirirya ati, "Aale atyanu mwize twabe."

15

Omuzabbibbu n'amasaga gaagwo

¹ Awo oYesu n'akoba abeegibe ati, "Ninze ekitina ky'omuzabbibbu ogunanyerenyeere, kaisi oBbaabba niye omulimi waagwo. ² Ansalaku buli isaga erindiku eritaneneka neenu nga waasalira* lidi erineneka kaisi lyezye okubala ino. ³ Kale inywe atyanu muli batukulye ooti masaga omulimi agaamalire okusalira olwakubba mwaikiriirye obukwenda obunalaab-bire egimuli. ⁴ Aale musigale nga muli bumo na nze, era zena nga ndi bumo na inywe. Ekyo kityo olwakubba mpaawo isaga erineneka okulwalyo. Liri n'okubba ku kitina kaisi ni lineneka. Kale nywena timwezya kukola ebikole oKibbumba ebyabasuubiriramu nga timuli bumo na nze."

⁵ Awo ni yeeyongera ati, "Ndi ooti kitina ky'omuzabbibbu, kaisi inywe ni mubba ooti masaga. Kale omuntu owaabba obumo na nze kaisi zena ni mba obumo naye akola ebikole ebisa bingi. Iye oyo abba ooti masaga agali oku muzabbibbu agabala ebineneka ebingi. Era anambula obubbeeri bwange mpaawo ekimwezya okukola. ⁶ Kale omuntu owaatabba obumo na nze, abba ooti isaga eribamuma eedi era ni liwotoka. Era agatyo niigo agebatoola ni bagamuma omu musyo ni gaya. ⁷ Neye owemubba obumo na nze, era ni musigala

* 15:2 15:2 Waasalira, Ooba, Waayonja.

nga mukolera oku bibono ebimbakoba, mwezuya okusaba kyonakyoona ekimutaka era oKibbumba yakibawanga. ⁸ Kale owemukola ebikole ebisa ebingi, oBbaabba bamugulumalya era mubba mweragire muti muli beegi bange.”

⁹ Awo oYesu ni yeeyongera okubakoba ati, “Atyo nakimo ng’oBbaabba owantakire, zena niyo engeri egimbatakamu inywe. Mweyongere okubba obumo na nze kaisi neyongere okubataka. ¹⁰ Atyanu, singa owemwakwatanga ebimbalagira, zena neyongeranga okubataka. Era kityo nakimo nga zena owenkwatanga ebyo oBbaabba ebyandagira ni yeeyongera okuntaka.”

¹¹ Awo oYesu ni yeeyongera ati, “Mbakobeire ebintu ebyo, kaisi oolwo mubbe n’eisangaalo eriri ooti lyange erindi nalyo, era mubbe nalyo omu bwizulye. ¹² Era ekiragiroyo kyange niikyo kinu ekiti, mutakanganenge, nga nze owenabatakire. ¹³ Mpaawo muntu aali n’okutaka okukiraku okw’oyo awaayo obwomibwe olw’abakaagwabe. ¹⁴ Singa musigala nga mukola ebimbalagira mulaga muti muli bakaagwa bange. ¹⁵ Nze tinkaali mbeeta baweererya olwakubba omuweererya tamanya omusengwawe ebyakola. Wazira mbeeta bakaagwa bange olwakubba inywe mbakobeire byonabyona oBbaabba ebiyankobeire. ¹⁶ Era tiniinywe omwasalirewo okubba beegi bange, neye ninze enabalonderemu inywe era ni mbatekawo okukolanga ebikole ebisa. Kaisi

awo oBbaabba ayezye okubawanga buli ekimusaba nga mubita omu liina lyange. ¹⁷ Era kinu niikyo ekimbalagira nti mutakanganenge.”

Abantu bacaawa abeegi ba Yesu

¹⁸ Kale awo oYesu ni yeeyongera okukoba ati, “Singa abantu abataikiririrya omu Kibbumba owebabacaawanga, mwewukiryenge muti ba-sookere kucaawa ninze. ¹⁹ Kale singa mub-baire bamo kwibo nago bandibbaire babataka nga inywe abaabwe. Kiri kiti, timuli bamo kwibo wazira inywe nabalonderemu okuzwa omu bantu abo. Ekyo niikyo ekigira abo aban-jakanisya ni babacaawa. ²⁰ Aale mwewukirye ebibono ebinabakobeire nti, ‘Mpaawo mu-galama abba ow’ekitiisya okukiraku omuseng-wawe.’ Owekibba nti nze banjiigaanirye, na inywe nywena balibagadya, era ng’owekiri nti bakwaite okwegesya kwange, n’ebyanywe by-ona balibikwata. ²¹ Ibo baaba okubagadyanga olwakubba inywe muli bange, era olwakubba tibamaite oyo eyantumire. ²² Aale singa tinaizire ni ntumula nabo, oKibbumba tiyandibbaire abalumariza olw’ekibbikibbi. Neye atyanu bab-ula kyokuwozyeryaku olw’ekibbikibbi kyabwe. ²³ Iye ancaawa acaawa n’oBbaabba yena. ²⁴ Aale singa tibaboine nga nkola ebyamagero ebyo omuntu yenayena ogondi ebyatakolangaku, oKibbumba tiyandibbaire abasalira omusango olw’ekibbikibbi. Neye atyanu baboine ebyam-agero ebyo, kaisi era ni basigala nga batucaawa

nze n'oBbaabba. ²⁵ Neye ebyo ibyo byokutuukirirya kibawandiikire omwIteeka lyabwe bati, 'Bancaawire anambula nsonga.' "

²⁶ Kale oYesu ni yeeyongera ati, "Omubbeeri oweyaliiza oyo ogunalibasindikira ng'azwa egiri oBbaabba, yalikobera abantu ebinkwataku. Omubbeeri oyo nago yalibba Mwoyo atumula amazima agakwata oku Bbaabba era azwera nakimo egiri oBbaabba. ²⁷ Era nywena muteekwa okukobera abandi ebinkwataku olwakubba mubbaire na nze kuzwera nakimo owenatandiikiire okwegesya."

16

¹ Awo oYesu ni yeeyongera ati, "Ebyo byonabyona mbibakobeire kaisi timwesiitaala ni muleka okwikirirya kwanywe. ² Balibabbinga omu makumbaaniro. Era amazima gali gati, ekiseera kyaba okutuuka nga buli abaita inywe aseega ati omu kukola ekyo aweererya Kibumba. ³ Ebyo balibibakola olwaibo okutamanya oBbaabba ekyali, ooba nze ekyendi. ⁴ Neye ebyo mbibakobeire, kaisi oolwo ekiseera kyabyo owekyalituuka, mwezye okwewukirya muti nabalabwire." Awo oYesu ni yeeyongera okutumula nabo ati, "Omu ntandiika y'okwikirirya kwanywe, tinabakobeire oku byokubagadya ebyo olwakubba nabbaire nkaali ndi na inywe."

OMwoyo oMweru ebyakola

⁵ "Neye atyanu njaba egiri oyo eyantumire, wazira mpaawo kwinywe ambuulya eginjaba. ⁶ Inywe olwakubba mbakobeire nti njaba

okubazwaku, tete emyoyo gyanywe giirire ni giizula nima. ⁷ Neye mbakobera amazima nti nze okubazwaku okwaba egiri oBbaabba kibagasa niinywe olwakubba owentayaba, omubbeeri oMwoyo oMweru tiyaliiza egimuli. Cooka owenjaba, nalimutuma egimuli. ⁸ Era Iye oweyaliiza, yalirumiriza abataikiririrya omu Kibbumba ati enseega yaabwe tintuuce oku bikwata oku kibbikibbi n'oku muntuki omutuukirirye. Era yalibalaga n'oku muntu w'engeriki oKibbumba oguyalisingisya omusango. ⁹ Era omusango ogwo gwalibba gusinzirira ku kibbikibbi eky'omuntu ekyokutanjikiririryamu. ¹⁰ Era oMwoyo oMweru yaliraga ati enseega yaabwe tintuuce oku butuukirirye bwange olwakubba nkanga egiri oBbaabba eeyo egimwabba nga timukaali mumbona. ¹¹ N'okubikwata oku kusala omusango, era byona oMwoyo oMweru yalikakasa abantu ng'oKibbumba oweyamalire okusingisya oSitaani omusango. Era oSitaani oyo nago niye omufugi w'abantu abakola ebibibibi.”

¹² Awo oYesu era n'abakoba ati, “Nkaali ndi na bingi ebyokubakobera, neye byabba ng'atyanu bibitiriri inywe okubikwata. ¹³ Neye iye oMwoyo amanyikisya abantu amazima agakwata oku Kibbumba oweyaliiza, yalibalunganya ni mumanya amazima ago gonagona. Ekyo kityo olwakubba tiyalitumula kululwe, wazira yalitumulanga biiby byonkani ebiyaliwuliranga okuzwa egiri oKibbumba, era n'okubakoberanga ebyaba okwiza. ¹⁴ Era oMwoyo oyo yangulumalyanga olwakubba yabakoberanga kiikyo ekiyawuliranga

okuzwa egyendi. ¹⁵ Kale ebintu byonabyona oBbaabba ebyalinabyo byange, era ekyo nikiyo ekigira ni mbakoba inywe nti oMwoyo yabakoberanga biiby ebiyawuliranga okuzwa egyendi.”

Enima n'eisangaalo

¹⁶ Awo oYesu n'abakoba ati, “Omwibbanga litono mwabba nga timukaali mumbona, kaisi tete oluzwanyuma lw'eibbanga litono, mumbone.”

¹⁷ Awo abamo oku beegibe ni bakobangana bati, “Ategeeza niki okutukoba ati, ‘Omwibbanga litono mwabba nga timukaali mumbona, kaisi oluzwanyuma lw'eibbanga litono tete mumbone,’ era ati, ‘Ekyo kityo olwakubba njaba egiri oBbaabba?’ ” ¹⁸ Era ni beegumya okwebuulyangana bati, “Ategeeza niki okukoba ati, ‘Mwibbanga litono?’ Cooka titutegeera ekyo ekyakoba.”

¹⁹ Awo oYesu n'ategeera ati bataka okumubulya oku bintu ebyo, kale n'abakoba ati, “Muli kwebuulyangana ku kintegeezere owenkobere nti, ‘Omwibbanga litono mwabba nga timukaali mumbona, kaisi tete oluzwanyuma lw'eibbanga litono, mumbone?’ ” ²⁰ Aale mbakobera amazima nti, inywe mwalikunganga era mwalikubbanga enduulu, neenu abantu abakola eby'ekyalo nga ibo bajaagaana. Inywe enima yalibakwata, neye tete enima yaanywe yalisuukamu isangaalo. ²¹ Cooka kyalibba ooti mukali alumwa. Iye abba omu bulumi bungi olwakubba ekiseerakye kibba kituukire. Neye owaamala

okubyala, yeerabira okugada okunene okwab-bairemu, olw'eisangaalo ery'okubyala omwana oku kyalo. ²² Kale inywe, atyanu ikyo kiseera kyanywe ekyenima, neye tete nalibabona era ni musangaala, era mpaawo eyalibatoolaku eisan-gaalo lyanywe. ²³ Era ekiseera ekyo owekyali-tuuka mwalibbanga tete mpaawo ekimunsaba. Cooka mbakobera amazima nti oBbaabba yal-ibba ng'abawa buli ekimumusaba omu liina lyange. ²⁴ Wazira paka lwatyanu mubbaire mukaali okumusabangaku ekintu kyonakyaona omu liina lyange. Neye atyanu aale musabenge era mwalisuna, n'eisangaalo lyanywe lyalibba mu bwizulye."

Okuwangula ekyalo

²⁵ Era oYesu ni yeeyongerera ati, "Waire nga nzwa okutumulanga ebintu ebyo mu ngero, ekiseera kyaba okutuuka mbe nga tinkaali ntumula nga nkolesya ntumula eeyo, wazira nga mbakobera lwatu ebifa oku Bbaabba. ²⁶ Era omu kiseera ekyo mwalibbanga musaba mu liina lyange. Cooka tindi kukoba nti kyalyetaag-isyanga ninze okubasabiranga egiri oBbaabba okubawa ekimwasabanga. ²⁷ Wazira oBbaabba iye onyere abataka yabawanga ekimwamusabanga olwakubba muntaka era mwikirirya muti nazwire giri niye. ²⁸ Nze nazwire giri Bbaabba kaisi ni njiza oku kyalo. Kale atyanu ndi kuzwa oku kyalo, era nkanga egiri oBbaabba."

²⁹ Awo abeegi ba Yesu ni bakoba bati, "Cooka awo atyanu oli kutumulanga lwatu era nga tokolesya ngero. ³⁰ Era atyanu tutegeire tuti

omaite ebintu byonabyona, era tuti tikyetaagisya waire n'omuntu yenayena okukubuulya ebibuulyo. Era ekyo kituzweramu kwikirirya tuti wazwire giri Kibbumba.”

³¹ Kale awo oYesu n'ababuulya ati, “Atyanu mwikirirya? ³² Neye ekiseera kiiza, era kituukire, owemwasalaanikira buli muntu okukanga e wuwe. Inywe mwaba kundeka zenkani. Cooka ekinyere kiri kiti tinaabbe zenkani olwakubba oBbaabba ali aamo na nze. ³³ Era ebyo mbibakobeire, kaisi oolwo mubbe n'eidembe omu myoyo gyanywe olw'enkologana yaanywe na nze. Cooka oku kyalo kunu mwabbanga n'okugada, neye mugume olwakubba nze mpangwire amaani g'ekyalo kinu.”

17

OYesu yeesabira iye onyere

¹ Awo oYesu oweyamalire okutumula ebyo, n'agangamula omutwe okulingirira omwigulu kaisi n'asaba ati:

“Bbaabba, ekiseera kituukire. Aale atyanu olage abantu ekitiisya ky'oMwanawo ng'owekiri eky'amaani, kaisi yena ayezye okubalaga ekitiisya kyo eky'amaani.

² Ekyo kityo olwakubba wamuwaire obwezye oku bantu bonabona, kaisi ayezye okubawa ibo nago abewamuwaire obwomi obutawaawo. ³ Era ibwo obwomi obutawaawo obwo busunika mu ngeri eenu eti: Abantu bali n'okukumanya niiwe oKibbumba wenkani onanyerenyeere, era n'okumanya oYesu Kurisito

oguwatumire okununula abantu. ⁴ Nze ndagire abantu ekitiisyakyo ng'owekiri eky'amaani omu kukola era ni mmala omulimo oguwampaire okukola.

⁵ Bbaabba, aale atyanu tete onganye mbe n'ekitiisya kidi ekinabbaire nakyo owenabbaire na iwe omwigulu nga n'ekyalo kikaali n'okubbaawo."

OYesu asabira abeegibe

⁶ Awo oYesu ni yeeyongera okusaba ati, "Mmanyikisiry e abantu abewampaire, ikyo ekyo ekyoli. Abantu abo nago niibo abewampaire

ng'obatoola mu badi abakwikiririyamu. Ibo abantu abo babbaire babo, n'obampa era bakwaite ekibonokyo. ⁷ Era atyanu bamaite bati obukwenda

n'ebyo byonabyona ebinkola bizwa giri niiwe. ⁸ Ekyo kityo olwakubba nabakobeire ebi-bono

ebiwampaire, era ni babiikirirya. Era bakakasi-ire nakimo

bati nazwire giri niiwe, era ni baikirirya bati wantumire. ⁹ Kale mbasabira. Cooka tindi kusabiranga bantu abatakwikiririyamu, wazira

nsabira baabo abewampaire olwakubba babo.

¹⁰ Era abo abendi nabo bonabona babo, n'ababo era bange. Era balagire bati ekitiisya kyange ky'amaani. ¹¹ Aale atyanu nze ngonu njaba

okuzwa oku kyalo era ndi kwiza egyoli neye ibo bakaali bali oku kyalo. Iwe Bbaabba oMweru,

obakuumenge omu bwezyebwo obuwampaire
kaisi
beezye okubbanga nakimo ooti niiswe owetuli
ekimo.

¹² Era owenabbaire nabo, cooka olw'obwezye obuwampaire, nabakuumire era ekigosi nandi kibatuukaku. Era mpaawo kwibo eyagotereku okutoolaku oyo eyabbaire atekwa okugota kaisi eKiwandiike kyezye okutuukirira.”

¹³ Awo oYesu ni yeeyongera okusaba ati,
“Aale ngonu atyanu njiza egyoli, neye ebyo mbitumula nga nkaali ndi oku kyalo kaisi eisangaalo lyange libbe mu bwizulye omu basengereri bange. ¹⁴ Era nabawaire ekibonokyo n'olwekyo ekyalo ni kibacaawa olwakubba nti ibo nago tibakaali b'ekyalo ooti ninze owentali w'ekyalo. ¹⁵ Cooka tinkusaba nti obatoole oku kyalo, wazira nti obakuume eeri omubbimubbi oSitaani. ¹⁶ Nti ibo tibekyalo ooti ninze owentali waakyo. ¹⁷ Aale obaturukulye ng'okolesya obwezye bw'ekibonokyo. Nti ekibonokyo niigo amazima. ¹⁸ Cooka ng'owewantumire oku kyalo, ntyo zena niiyo owembatumire oku kyalo. ¹⁹ Nze newaayo egyoli kaisi bona abanyere beezye okweweerayo nakimo egyoli.”

OYesu asabira abaikiriryabe

²⁰ Awo oYesu ni yeeyongera okusaba ati,
“Tinsabira beegi banu bonkani, neye n'abo

abalinjikiririryamu olw'obukwenda bwa banu.

²¹ Era Bbaabba, ekyo kityo kaisi bonabona
babbenge

bumo, ooti niiwe owooli obumo na nze, era zena
owendi obumo na iwe. Mbasabira nti bona
babbenge bumo na iswe kaisi abantu beezye

okwikirirya bati iwe wantumire. ²² Era

mbasuucirye okubba b'ekitiisya zena

ng'owonsuucirye kaisi beezye okubbanga bumo
ooti

ninze owendi obumo na iwe. ²³ Ekikoba kiti,
ntaka

ibo beegaite nga ibo owebali bagaite na nze era

nga iwe owooli mugaite na nze. Era mbasabira

nti

babbeere nakimo bumo, kaisi abantu bategeere

bati

wantumire, era obataka ng'owontaka.”

²⁴ Era oYesu ni yeeyongera ati,

“Bbaabba, abantu abewampaire, ntaka
lubbe

lumo nga bali na nze omwigulu eeyo eginjaba

okubba,

era babbeeyo okubonaku ekitiisya ekinalib-

baamu.

Cooka ekitiisya ekyo wakimpaire olwakubba

wantakire nga n'ekyalo tikibbumbe. ²⁵ Bbaabba

omutuukirirye, abantu tibakumaite, neye nze

nkumaite, era bamaite bati wantumire. ²⁶ Era

nabamanyikisirye ikyo ekyo ekyoli, era njaba

okweyongera okubamanyikisya ikyo ekyo nago,

kaisi bona batakenge abantu abandi ooti niiwe

owewantakire era kaisi nze mbe kimo nabo.”

18

Bakwata oYesu

(Mat 26:47-56; Mak 14:43-50; Luk 22:47-53)

¹ Awo oYesu oweyamalire okusaba okwo, n'asimbuka n'abeegibe, ni basalamu ogwinamo ogubeeta bati Kidulooni. Okwitale kudi okubasomokere wabbaireyo omusiri gw'emisaale emizaituuni era iye n'abeegibe ni baingira oomwo.

² Atyanu iye oYuda, eyamuliiremu olukwe, yabbaire amaite ekifo ekyo olwakubba oYesu yatiranga okwaba n'akumbaana eeyo n'abeegibe.

³ Kale awo oYuda n'ayaba omu musiri ogwo nago ng'akudembereire ekibinja ky'abaisulukale, n'abakuumi abamo ab'eYeekaalu. Era ibo abo abeyabbaire yeekubbembereire, abakabona abakulu n'aBafalisaayo niibo ababbaire babatumire. Era ibo nago babbaire bakwaite ebimoleka ooti mole n'amataala era n'ebyokulwanisya.

⁴ Cooka oYesu yamaite byonabyona ebyaba okumutuukaku, kale awo ni yeetoolayo, era n'ababuulya ati, "Munoonia naani?" ⁵ Awo ibo ni bamwiramu bati, "Yesu ow'e Naazaleesi." OYesu n'abakoba ati, "Ninze onu." Era oYuda eyamuliiremu olukwe, yabbaire ayemereire awo nabo. ⁶ Cooka oYesu oweyabakobere ati, "Ninze onu," ibo ni baira e nyuma era ni bagwa ansi.

⁷ Awo oYesu n'ababuulya omulundi ogwokubiri ati, "Munoonia naani?" Tete ni bairamu bati, "Yesu ow'e Naazaleesi."

⁸ Era oYesu n'abairamu ati, "Mbakobeire nti ninze onu. Aale obanga munoonia ninze, muleke abeegi bange banu ibo baabe." ⁹ Ekyo

kyabbairewo kaisi oolwo ebibono ebiyabbaire atumwire byezye okutuukirira, ebikoba biti, “Kwabo abewampaire tinagoteryeku kadi moiza.”

¹⁰ Cooka oSimooni Peetero omoiza oku beegi ba Yesu yabbaire n’empiima, kale awo n’agitoolayo, n’atemaku omugalama wa kabona akira obukulu ekitwi eky’oku ndiir, n’amutiicaaku. Era omugalama oyo nago yabbaire niiye oMaluko. ¹¹ Awo oYesu n’alagira oPeetero ati, “Empiimayo ogikanjeeyo omu kiruutu kyayo. Iwe oseega oti tindi n’okubita omu kipimo kyokugada kudi oBbaabba okwataka mbitemu?”

OYesu bamutwala egiri Anasi

¹² Awo ekibinja ky’abaisulukale n’omuduumiri waabwe, era n’abakungu b’aBayudaaya ni bakwata oYesu. Awo ni bamusibira aamo engalogye e nyuma, ¹³ kaisi ni basooka bamutwala egiri Anasi. Oyo yabbaire niiye oiteeye wa muka Kayaafa era oKayaafa oyo yabbaire niiye okabona akira obukulu omu mwanka ogwo. ¹⁴ Era oKayaafa nago niiye eyabbaire awaire aBayudaaya amalabuki ati kibba kisa omuntu omoiza okufeererera abantu.

OPeetero yeegaana oYesu

(Mat 26:69-70; Mak 14:66-68; Luk 22:55-57)

¹⁵ Awo oSimooni Peetero n’omwegi omwinaye ni basenjaaku oYesu. Cooka omwegi oyo olwakubba yabbaire mumanye eeri okabona akira

obukulu, iye n'asenjaaku oYesu ni baingira omu luuga lwa kabona oyo. ¹⁶ Neye iye oPeetero yabaire n'okukuumira nza ku geeti. Kale omwegi oodi nago eyabaire omumanye, n'akanga e nza okutumula n'omwala eyabaire omukuumi w'oku geeti, era n'aingirya oPeetero. ¹⁷ Awo omwala oyo nago n'abuulya oPeetero ati, "Wena toli moiza oku beegi b'omusaiza nago?" Iye oPeetero n'amwiramumu ati, "Nze bbe."

¹⁸ Cooka empewo yabaireku era abagalama ba kabona akira obukulu n'abakuumi b'eYeekaalu babaire beemereire okweruguulirirya ekisiki ky'omusyo ekibabaire bakumire okwota. Kale awo oPeetero yena yabaire ayemereire nabo ng'ayota omusyo.

*Okabona akira obukulu abuulya oYesu
(Mat 26:59-66; Mak 14:55-64; Luk 22:66-71)*

¹⁹ Awo, okabona akira obukulu n'abuulya oYesu oku beegibe, n'okwebyo iye oYesu ebyayegesya.

²⁰ Iye oYesu n'amwiramumu ati, "Nze ntumulanga lwatu eeri abantu. Nze nenca njegesyanga omu makumbaaniro n'omu luuga lw'eYeekaalu aBayudaaya bonabona omu bakumbaaniranga. Tintumulangaku kintu kadi kimo omu kyama.

²¹ Kale aale lwaki obuulya ninze? Obuulye baadi abawuliranga ebinatumulanga. Mazima ibo babimaite."

²² Awo oYesu oweyatumwire ebyo, omoiza oku bakuumi b'eYeekaalu eyabaire okumpi n'oYesu, n'amukubba oluwi okwitama neenu waamukoba ati, "Eyo niiyo engeri egyoiramumu okabona akira obukulu?"

²³ Iye oYesu n'amwiramumu ati, "Obanga ekin-tumwire tikituuce, kaade okakase obutali butu-uce bwakyo. Neye obanga ntumwire kituuce, lwaki onkubbire?" ²⁴ Awo oYesu ng'akaali musibe w'engalogye Anasi n'amuweererya egiri oKayaafa okabona akira obukulu.

*OPeetero yeeyongera okwegaana oYesu
(Mat 26:71-75; Mak 14:69-72; Luk 22:58-62)*

²⁵ Awo oSimooni Peetero oweyabbaire ng'ayemereire ayota omusyo, tete ni wabbaawo omuntu ogondi n'amubuulya ati, "Iwe wena toli moiza oku beegi b'omusaiza nago?" Iye ni yeegaana ng'akoba ati, "Nze bbe."

²⁶ Cooka omoiza oku baweererya ba kabona akira obukulu, era omuganda w'oodi oPeetero oguyatiiciryeku ekitwi, n'amulumiriza ati, "Tinakuboine naye eedi omu musiri gw'emisaale emizaituuni?" ²⁷ Awo tete era oPeetero n'akyegaana, era n'omu kiseera ekyo onkoko n'akookoola.

*OYesu omu maiso ga Piraato
(Mat 27:1-2,11-14; Mak 15:1-5; Luk 23:1-5)*

²⁸ Awo oYesu ni bamutoola e wa Kayaafa, ni bamutwala omu lubiri lw'omufugi omu Looma. Omu kiseera ekyo obwire bwab-baire bwankaca. Era aBayudaaya tibaingire omu lubiri olwakubba okwingira kyab-baire kibasuuca okubba tibatakulye era ni babba nga tibasaanira okulya oku Mukolo ogw'oKutambukirya. ²⁹ N'olwekyo oPiraato n'awuluka nza egibali era n'ababuulya ati, "Musa-goki ogumuvunaana omusaiza onu?"

³⁰ Ibo ni bamwiramumu bati, “Singa abbaire abula musango, titwandimuleetere okumukukwatisya.”

³¹ Awo oPiraato n’abakoba ati, “Aale atyanu inywe mumutwale mumuwozesye okusinzirira oku mateeka agaanywe.”

ABayudaaya ni bamukoba bati, “Nti iswe tibatwikirirya kwita muntu yenayena.” ³² Ekyo kyabbairewo kaisi oYesu ebibono ebiyabbaire atumwire ng’alaga engeri egiyabbaire ayaba okufaamu, byezye okutuukirira.

³³ Awo oPiraato n’akanga omu lubiri, kaisi n’alagira ni beeta oYesu kaisi n’amubuulya ati, “Niiwe okabaka w’aBayudaaya?”

³⁴ OYesu n’amwiramumu ati, “Ekyo kiseegokyo, ooba bandi niibo abakukobeire ebinkwataku?”

³⁵ Awo oPiraato n’amubuulya ati, “Nze ndi Muyudaaya? Ibo bantu b’eigwangalyo, n’abakabona baanywe abakulu niibo abakunkwatisirye. Olwo nago niki ekyokolere?”

³⁶ OYesu n’amwiramumu ati, “Obwakabaka bwange tibwa ku kyalo kunu. Singa ekyo kibbaire kityo, abantu bange bandirwaine, ni bakaisya aBayudaaya okunkwata. Neye obwakabaka obwange ibwo buzwa awandi.”

³⁷ Awo oPiraato n’amubuulya ati, “Olwo oli kabaka?”

OYesu n’amwiramumu ati, “Otuucirye okukoba oti ndi kabaka. Igo amazima gali gati, nze bambyaire kubba Kabaka era niikyo ekyandetere oku kyalo kunu era n’okukakasa abantu amazima. Era buli ataka amazima, ampulisirya.”

³⁸ Awo oPiraato n'amubuulya ati, "Amazima niikyo niki?"

Opiraato oweyamalire okubuulya oYesu ebyo, iye oPiraato n'awuluka tete e nza egiri aBayudaaya era n'abakoba ati, "Timbona ekyokuzweraku okumuvunaana omusango gwonagwona. ³⁹ Neye inywe munaliriire nze okubateererangaku omusibe moiza oku lunaku lw'oMukolo ogw'oKutambukirya. Kale oolwo mutaka mbateerere nago yoodi ogumukoba muti kabaka w'aBayudaaya?"

⁴⁰ Cooka ibo ni bakooka nga bamwiramu bati, "Bbe, tiyooyo! Otuwe Bbalaba!" OBBalaba oyo nago yabbaire musibe olw'akeediimo akeyabaire yeemigiiremu.

19

OYesu bamusalira ogw'okufa

(Mat 27:15-31; Mak 15:6-20; Luk 23:13-25)

¹ Awo oPiraato n'alagira abaisulukale okutwala oYesu bamufaamuule n'ofaalu aliku emirobo egisima. ² Era abaisulukale ni baluka engule eya mawa kaisi ni bagimuzwalisya oku mutwe. Bamuzwalisirye n'ekizwalo ekitukuliikiriri, ³ era ni basoosera okumwabaku okumukiina bati, "Owangaale, iwe oKabaka w'aBayudaaya!" Era batyo nga webamukubba empi oku matama.

⁴ Awo oPiraato era tete n'awuluka e nza, n'akoba aBayudaaya ati, "Aale mumpulisisyeku, ngonu njaba okumuwuluca egimuli okubamanyikisya nti timbona ekyokuzweraku okumuvunaana omusango gwonagwona." ⁵ Awo

oYesu ni bamuwuluca nga bamutiikire engule ey'amawa, era nga bamuzwalisirye ekizwalo ek-itukuliikiriri kaisi oPiraato n'abakoba ati, "Aale mubone omusaiza nago!"

⁶ Amangu ago ibo abakabona abakulu n'abakuumi b'eYeekaalu owebamuboine, ni bakooka bati, "Omukomerere oku musalabba, omukomerere oku musalabba!"

Neye oPiraato n'abakoba ati, "Inywe mutwale mumukomerere, neye okulwange timbona ekyokuzweraku okumuvunaana omusango gwonagwona." ⁷ Era ibo aBayudaaya ni beekalangula bati, "Iswe tuli n'eiteeka, era okusinzirira okwiteeka eeryo, atekwa kufa olwakubba yeeyeta okubba Mwana wa Kibbumba."

⁸ Awo oPiraato oweyawuliire ekyo, era ni yeeyongera ino okutya. ⁹ Kale n'alagira ni bakanjaayo oYesu omu lubiri kaisi n'ayaba n'abuulya oYesu ati, "Ozwera yaina?" Neye oYesu tiyamwiriremu. ¹⁰ Awo oPiraato n'amubuulya ati, "Ogaine okunjiramu? Tomaite oti ndi n'obwezye okukuteera ooba okukukomerera oku musalabba?"

¹¹ OYesu n'amwiramumu ati, "Tiwandibbaireku n'obwezye singa tiKibbumba kubukuwa. N'olwekyo iye oodi ampaireyo egyoli niiye aali n'ekibbikibbi ekikiraku." ¹² Okuzwa omu kiseera ekyo oPiraato n'agezyaku okuteera oYesu neye aBayudaaya nga beeyongera kukooka bati, "Singa oteera omusaiza oyo, waabba toli mukaagwa wa Kaisaali. Nti omuntu yenayena

iye eyeeyeta okubba kabaka, abba ayakanisya Kaisaali.”

¹³ Awo oPiraato oweyawuliire ebyo, n’alagira ni bawuluca oYesu oku luuga. Era oku luuga awo oPiraato n’atyama oku ntebeye ey’obulamuzi omu kifo ekibeeta bati Kya Mabaale aMaalirire, neye omu Lwebbulaniya bati, Gabbasa. ¹⁴ Era esaawa gyabbaire ooti mukaaga egy’omusana oku lunaku lwa kutegeka oMukolo ogw’oKutambukirya. Awo oPiraato n’akoba aBayudaaya ati, “Aale mumpulisisyeku, okabaka waanywe ngoyo!”

¹⁵ Neye ibo era ni bakooka bati, “Omumalewo, omumalewo, omukomerere oku musalabba!”

Awo oPiraato n’ababuulya ati, “Okabaka waanywe gumbe nkomerere oku musalabba?”

Abakabona abakulu ni bamwiramu bati, “Tubula kabaka gondi, wazira oKaisaali.”

¹⁶ Kale awo omu kukomenkereza, oPiraato n’abakwatisya oYesu baabe bamukomerere oku musalabba.

*OYesu bamukomerera oku musalabba
(Mat 27:32-44; Mak 15:21-32; Luk 23:26-43)*

Awo abaisulukale ni bakwata oYesu, ni bamu-toolawo. ¹⁷ Era omu kwaba yabbaire nga yeetikire omusalabbagwe okwaba omu kifo ekibeeta eky’eKiyanga, omu Lwebbulaniya ekibeeta Golgoosa. ¹⁸ Era omu kifo ekyo niiyo egibamukomereire oku musalabba. Era omu kifo ekinyere ekyo ni bakomerera n’abandi babiri oku misalabba gyabwe, oku lubba n’olubba, oYesu nga iye abalimu akati.

19 Awo oPiraato n'alagira ni bawandiika ekiwandiiko, ni bakikubbirira e ngulu oku musalabba, nga kisoma kiti, "OYESU OW'E NAAZALEESI, OKABAKA W'ABAYUDAAYA."

20 Era aBayudaaya bangi ni basoma ekiwandiiko ekyo olwakubba ekifo ekyo egibakomereire oYesu, kyabbaire kumpi n'ekibuga. Era

nti n'ekiwandiiko ekyo nago babbaire bakiwandiikire mu Lwebbulaniya, n'omu Lulantini, n'omu Luyonaani. 21 Awo

abakabona abakulu ab'aBayudaaya ni bakanga egiri oPiraato okwezuluguma bati, "Tibandikiwandiikire bati, 'Kabaka w'aBayudaaya,' wazira tutaka bakiwandiike bati, 'Omusaiza onu abbaire yeeyeta Kabaka w'aBayudaaya.' "

22 Awo oPiraato n'abairamu ati, "Ekyo ekyendagiire nti bawandiike kiri n'okubba kinyere ekyo."

23 Cooka abaisulukale owebamalire okukomerera oYesu oku musalabba, ni batwala ebizwalobye, ni babigabulamu emigabo eena, buli mwisulukale n'asunaku gumo. Neye iyo ekanzuye ey'omunda iyo n'esigala. Iyo babbaire tibagitungire-butungi, neye nga bagirukire-buluki yonayona okuzwa angulu paka ansi.

24 Kale abaisulukale ni bakobangana bati, "Titwaginyiiramu, neye tugikubbireku kalulu okusalawo eyagitwala."

Ekyo kyabbairewo kutuukirirya Kiwandiike ekikoba kiti:

"Bagabanire ebizwalo byange,

era ekanzu yange ni bagikubbiraku akalulu.”

Kale abaisulukale bona ekyo niikyo ekibakolere.

²⁵ Awo okumpi n’omusalabba gwa Yesu, wabbairewo omaaye, n’omuganda wa maaye, n’oMalyamu omuka Kulopaasi, era n’oMalyamu oMangadaleena nga beemereire. ²⁶ Kale oYesu oweyaboinewo omaaye, n’omwegi oodi oYesu oguyatakanga eino nga beemereire okumpi aawo, n’akoba omaaye ati, “Mama, oyo omutwale ng’omwanawo,” ²⁷ era n’akoba n’omwegiwe oyo nago ati, “Oyo omutwale ng’omaawo.” Okuzwa oolwo omwegi oyo n’atandiika okulabirira omaaye wa Yesu ng’omoiza oku bantu b’omu kisitokye.

Okufa kwa Yesu

(Mat 27:45-56; Mak 15:33-41; Luk 23:44-49)

²⁸ Awo oluzwanyuma ng’oYesu amalire okumanya ati amalire emirimo egibamutumire okukola era okutuukirirya eKiwandiike, n’akoba ati, “Enyonta enduma.” ²⁹ Abaisulukale babaire bateekere awo ensaka eizwire enviinyo ensasaami kale ni batimyamu ekijuulo. Awo ni bakiteeka oku kasaale akebeeta yisopu, kaisi ni basiirya okukituuca oku munwagwe. ³⁰ Awo oYesu oweyafunfuunireku enviinyo ensasaami egyo, n’akoba ati, “Kiwoire.” Era n’ekibono ekyo n’akotamya omutwe, era n’afa.

OYesu bamusumuta omu mpete

³¹ Awo, lwabbaire lunaku lwa kutegeka era ng'eizo lwabba Saabbaato olukulu. Kale olwakubba abeekubbemberi b'aBayudaaya babbaire tibataka emirambo okutuuca oku Saabbaato nga giri oku musalabba, ni basaba oPiraato olukusa bavune ebigerere bya bantu nago era n'emirambo bagyanuleyo. ³² N'olwekyo abaisulukale ni baiza okuvuna ebigerere byabwe moiza moiza nga basookera oku basaiza badi abebabbaire bakomereire aamo n'oYesu buli muntu oku musalabbagwe. ³³ Neye owebatuukire oku Yesu, ni babona nga iye amalire okufa, tibamuvunire ebigerere. ³⁴ Awo, iye omu kifo ky'okumuvuna, omoiza oku baisulukale n'amusumuta eisimo omu mpete okukakasa ng'afiire, amangu ago ni muzwamu eisaaye n'amaizi.

³⁵ Era omusaiza eyaboineku ng'ekyo kibbaawo yakikobeire abantu, era n'ekiyabakobeire ni kibba kituuce. Iye omusaiza nago amaite ati atumula mazima era akola atyo kaisi nywena mwezye okwikirirya. ³⁶ Ebyo byabbairewo kaisi oolwo eKiwandiike kituukirire ekikoba kiti, "Tibalimuvunaku eigumba kadi limo," ³⁷ era nga n'eKiwandiike ekindi owekikoba kiti, "Baliringirira yoodi ibo ogubalibba basumutire."

Okuliika oYesu

(Mat 27:57-61; Mak 15:42-47; Luk 23:50-56)

³⁸ Ebyo owebyawoire, oYusufu ow'Alimasaaya, n'ayaba n'asaba oPiraato omulambo gwa Yesu. Era oYusufu oyo nago yabbaire mwegi wa Yesu, neye nga w'omu mbiso olw'okutya aBayudaaya.

Awo ng'asunire olukusa okuzwa eeri oPiraato, n'ayaba n'atoolayo omulambo gwa Yesu.

³⁹ OYusufu yabbaire n'oNikodemu omusaiza nago enyumaku eedi eyacaaliire oYesu obwire. Era oNikodemu yaabire n'ekiro ooti 33 egya kalifuwa ogubeeta omiira omutabulemu ekigaji.

⁴⁰ Awo ni batwala omulambo gwa Yesu nga bagusiigire okalifuwa, ni bagulingira omu ngoye egitukula empyaka egy'ebbeeyi! Eyo yabbaire niyo empisa y'aBayudaaya ey'okuliika abafu.

⁴¹ Omu kifo oYesu egibamukomereire oku musalabba, wabbairewo omusiri omwabbaire amagombe ag'empuku amayaaka, agebabbaire tibateekangakuumu mulambo. ⁴² Era olwakubba wabbaire kumpi, oomwo niimwo omu batekere omulambo gwa Yesu. Ekyo kityo olwakubba lwabbaire lunaku lw'aBayudaaya kwetegekaraku ng'eizo lwabba Saabbaato.

20

Okuzuukira kwa Yesu (Mat 28:1-8; Mak 16:1-8; Luk 24:1-12)

¹ Awo oku lunaku olwesaabbiiti* oMalyamu oMangadaleena n'awuuna makeezi pwi omu kandikiirya oku magombe ag'empuku aga Yesu. Cooka yaajiirye eibbaale eryabbaire omu mulyango nga balitoirewo. ² N'olwekyo n'airuka egiri oSimooni Peetero, n'omwegi odi ogondi oYesu oguyatakanga eino, n'abakoba ati,

19:39 19:39 Yok 3:1-2 * **20:1** 20:1 EBbaibbuli egimo gikoba giti, Lunaku olusooka omu saabbiiti.

“OMusengwa bamutoiremu omu magombe, era titumaite n’egibamuteekere!”

³ Awo oPeetero n’omwegi odi nago ni basimbuka ni baaba oku magombe. ⁴ Bonabona baabire nga bairukira aamo, neye omwegi oodi nago n’akiraku oPeetero okwiruka, n’amusooka oku magombe. ⁵ Cooka tiyaangiiremu wazira yakomere mu mulyango era n’akotama okulolamu, n’abona ngoye njereere nga bagiteekere awo.

⁶ Awo oSimooni Peetero eyabbaire amusenjaaku yena n’atuuka neye iye n’aingiramu, era yena n’abona omu magombe ngoye nga bagiteekere awo. ⁷ Era yaboine n’ekiwero ekibabbaire basibiire oYesu oku mutwe okubwika omumaiso. Ikyo kyabbaire bakiringire kusani nga kiri ku mbale kyonkani. ⁸ Oku nkomerero omwegi odi nago eyabbaire n’oPeetero era eyeekereire okutuuka oku magombe, yena n’aingira n’abona, era n’aikirirya. ⁹ Neye era babbaire bakaali okutegeera eKiwandiike ekiti, oYesu yabbaire atekwa okuzuukira. ¹⁰ Awo abeegi abo ni bakanga egibaabbanga.

*OYesu abonekera oMalyamu oMangadaleena
(Mat 28:9-10; Mak 16:9-11)*

¹¹ Neye oMalyamu oMangadaleena yabbaire ayemereire e nza w’amagombe ag’empuku nago, ng’akunga. Kale awo oweyabbaire akaali akunga, n’akotama n’alola omu magombe, ¹² era n’abona abamalaika babiri. Babbaire mu bizwalo byeru nga batyaime, omoiza e namutwe, n’ogondi e nabigere omu kifo egibabbaire bateekere omulambo gwa Yesu. ¹³ Awo

ni bamubuulya bati, “Mukali iwe, okunga niki?” Iye n’abairamu ati, “OMusengwa wange bamutoiremu, era timmaiteku egibamuteekere!”

¹⁴ Awo oMalyamu oweyamalire okutumula ebyo, n’agaluka n’alola e nyuma, n’abona oYesu ng’ayemereire awo, neye tiyamumanyicirye ati niye oYesu. ¹⁵ Awo oYesu yena n’amubuulya ati, “Mukali iwe, okunga niki? Onoonia naani?” Iye oMalyamu olw’okumusubiriramu okubba niye omulabiriri w’omusiri ogwo, n’amukoba ati, “Sebo, obanga niwe omutoiremu, ondagirire egyomuteekere njabe mmutooleyo.”

¹⁶ Awo oYesu n’amweta ati, “Malyamu!” Awo oMalyamu n’agaluka okumulolaku, kaisi n’amukoba omu Lwebbulaniya ati, “Labbooni!” Ekitegeeza kiti, “Musomesya.” ¹⁷ Awo oYesu n’amukoba ati, “Tiwaneevambiryaku olwakubba nkaali okukanga egiri oBbaabba. Wazira oyabe egiri abaganda bange obakobere oti, ‘Nkanga egiri oBbaabba era oItewaanywe, oKibbumba wange era oKibbumba waanywe.’ ”

¹⁸ Era oMalyamu oMangadaleena n’ayaba, n’akobera abeegi ati, “Mboine oMusengwa!” Era n’abakobera oMusengwa ebyamukobere.

OYesu abonekera abeegibe

(Mat 28:16-20; Mak 16:14-18; Luk 24:36-49)

¹⁹ Awo oku lunaku lwesaabbiiti olwo nago eigolo abeegi babbaire beefungiriirye omu nyumba olw’okutya aBayudaaya, oYesu n’aiza, n’abeemereramu akati, n’abakoba ati, “Eidembe libbe na inywe!” ²⁰ Oweyamalire okutumula atyo, n’abalagisya engalogye n’ebigerebye

n'empetegye. Awo abeegi ni basangaala ino owebaboinuku oMusengwa.

²¹ Era n'airamu n'abakoba ati, "Eidembe libbe na inywe. Ng'oBbaabba oweyantumire, zena mbatuma."

²² Oweyamalire okutumula ebyo, n'abayeereraku omuyeerero, n'abakoba ati, "Musune oMwoyo oMweru.

²³ Owemwasoniyanga omuntu yenayena ebikole ebibbibbi ebyakola, oKibbumba yena yaabbanga amusonyire era singa owemutamusonyenge, oKibbumba yena yaabbanga tamusonyire."

OYesu yeeragisya egiri oTomasi

²⁴ Awo oTomasi omoiza oku beegi eikumi na babiri, ogubeeta oDidimo,† tiyabbaire n'abainaye oYesu oweyabeeragisiirye. ²⁵ Kale abeegi abainaye ni bamukobera bati, "Tuboine oMusengwa."

Neye iye n'abakoba ati, "Okutoolaku nga mboineku enkozu egy'emisumaali omu ngalogye, era ni nkubya olunwe lwange omu nkozu nago, era ni nkwata n'omu mpetegye, tinakikirirye."

²⁶ Awo owewabitirewo enaku munaana, abeegi ba Yesu tete babbaire bali omu nyumba, leero nga bali n'oTomasi. Waire nga babbaire beefungiriirye oomwo, oYesu n'aingira n'ababbaamu nga ayemereire, kaisi n'abakoba ati, "Eidembe libbe na inywe." ²⁷ Awo n'akoba iye oTomasi ati, "Okubbye aanu olunwe, era

20:23 20:23 Mat 16:19; 18:18 † **20:24** 20:24 Litegeeza, OMulongo.

obone engalo gyange. Era oleete engaloyo onkwate omu mpete. Aale atyanu olekeraawo okubuusabuusa, wazira oikirirye.”

²⁸ Awo oTomasi n’amwiramumu ati, “Niiwe oMusengwa wange, era oKibumba wange!”

²⁹ OYesu n’amukoba ati, “Iwe oikiriirye olwakubba omboineku. Ibo nga b’enkabi abatambonangaku neye ni baikirirya!”

Ekyawandiikisiry ekitabo kinu

³⁰ OYesu yakolere obumanyiciryo bw’ebyewunyo obundi bungu ng’abeegibe babona obutali buwandiike omu kitabo kinu. ³¹ Neye obwo babuwandiikire kaisi mwezye okwikirirya muti oYesu niye oKurisito ogubasukireku amafuta. Era muti niye oMwana wa Kibumba, era olw’okwikirirya mutyo, kaisi mwezye okusuna obwomi obutawaawo.

21

OYesu abonekera abeegibe oku nyanza

¹ Ebyo owebyawoire, oluzwanyuma lw’enaku ntono oYesu n’abonekera tete abeegibe oku nyanza oTibberiyu.* Ikyo kyabairewo kiti:

² OSimooni Peetero, n’oTomasi ogubeeta oMulongo, n’oNasanairi ow’e Kaana eky’e Galiraaya, n’abataane ba Zebedaayo, n’abeegi ba Yesu abandi babiri, bonabona abo babaire aamo.

³ Awo oSimooni Peetero n’abakoba ati, “Nze njaba kuvuba.” Ibo ni bamukoba bati, “Swena

* **21:1** 21:1 Ooba, Galiraaya.

oleke twabe na iwe.” Era awo ni baaba, ni bani-ina omu lyato. Cooka ekiire ekyo kyonakyona ni batakwatisyaku ekintu.

⁴ Neye amakeezi nga buca, oYesu n’abonekera oku mbale kw’enyanza ng’ayemereire, Cooka abeegibe ni batamumanyica bati niye.

⁵ Awo oYesu n’abeeterera ati, “Bainange, mu-papairyekuuyo?” Ni bamwiramumu bati, “Bbe.”

⁶ Iye n’abakoba ati, “Aale mutege akatimba kaanywe oku lubba lw’engalo endiire lw’eryato era mwapapalyawo.” Owebategere ni batezya okukakuusira omu lyato olw’obuzito bw’enyanyi empitiriri egibabaire bapapairyey.

⁷ Awo omwegi oodi oYesu oguyatakanga eino, n’akoba oPeetero ati, “Oyo Musengwa!” Amangu ago oSimooni Peetero oweyawuliire ng’oodi akoba ati, “Oyo Musengwa,” n’azwala ekizibaa-wokye, olwakubba yabbaire akitoiremu, kaisi n’agwa omu maizi. ⁸ Abeegi badi abandi ni bamusenjaaku nga ibo bali omu lyato, neenu webakuusa akatimba akaizwire enyanyi. Ekyo kyabbaire kityo olwakubba tibabaire yala n’okulukalu, ng’eibbanga ly’emita ooti 90. ⁹ Awo owebatuukire oku lukalu, ni babona omusyo nga baguteekereku enyanyi, era n’ekyokulya nga kiri awo.

¹⁰ Awo oYesu n’abakoba ati, “Muleeteku enyanyi egimwankazwa okupapalya.”

¹¹ OSimooni Peetero n’aniina omu lyato kaisi n’akulukusa akatimba, n’akasomoca oku lukalu. Kabbaire kaizwire aganyanyi aganene

153. Newankubbaire nga gabbaire gangi ino gatyo, akatimba tikatiikire.

¹² Awo oYesu n'abakoba ati, "Mwize okulya eky'amakeezi." Cooka oku beegibe, mpaawo eyagumire okumubuulya ati, "Niiwe onaani?" Ibo babbaire bamaite bati niiye oMusengwa. ¹³ Kale oYesu n'ayaba n'atoola ekyokulya n'abawa era n'atoola n'enyanyi gyona n'agibawa.

¹⁴ Ogwo atyanu gwabbaire mulundi gwokusatu oYesu okubonekera abeegibe oluzwanyuma lw'okumuzuukiza.

OYesu batumulamu n'oPeetero

¹⁵ Awo owebamalire okulya, oYesu n'abuulya oSimooni Peetero ati, "Simooni omwana wa Yokaana, ontaka ino okukiraku abainawo?"

Iye n'amwiramumu ati, "Niikyo ekyo Musengwa, era iwe omaite oti nkutaka."

Awo oYesu n'amukoba ati, "Aale olisyenge entaama gyange."

¹⁶ Era tete n'amubuulya omulundi ogwokubiri ati, "Simooni omwana wa Yokaana, ontaka?"

Iye n'amwiramumu ati, "Niikyo ekyo Musengwa, omaite oti nkutaka." OYesu n'amukoba ati, "Olisyenge entaama gyange."

¹⁷ Tete n'amubuulya omulundi ogwokusatu ati, "Simooni omwana wa Yokaana, ontaka?"

Ekyo ni kimuluma olwakubba oYesu yamubwirye omulundi ogwokusatu ati, "Ontaka?" Iye n'amwiramumu ati, "Musengwa, iwe mpaawo ekyotamaite. Omaite oti nkutaka."

OYesu n'amukoba ati, "Olisyenge entaama gyange. ¹⁸ Nkukobera amazima nti owewabbaire

ng'oli munyeete, wazwalanga n'oyaba egyotaka. Neye atyanu owookulire, waliteekawo engalogyo, ni bakuzwalisya kaisi ni bakutwala egyotataka." ¹⁹ Ekyo oYesu yakitumwire, ng'alaga enfa oPeetero egiyalifaamu okugulumalya oKibumba. Era awo, n'akoba oPeetero ati, "Weegumye okubba musengereri wange."

²⁰ Awo oPeetero n'agaluka okulola e nyuma, n'abona omwegi oodi oYesu oguyatakanga, ng'abasengererya. Omwegi oyo nago, niiye oodi eyeigikireku oku Yesu omu kifubba katonu nga balya, kaisi n'amubuulya ati, "Musengwa, naani eyakulyamu olukwe?" ²¹ Awo oPeetero oweyamuboine, n'abuulya oYesu ati, "Musengwa, onu iye yalibba atya?" ²² OYesu n'amwiramumu ati, "Singa owentaka nti asigale mwomi paka owenaliira, ekyo kikukwataku? Iwe weegumye kubba musengereri wange." ²³ Olw'ekibono ekyo okalebule n'asaalaana omu boluganda ati omwegi oPeetero ogubabbaire batumulaku nago, tiyalifa. Neye oYesu iye tiyakobere ati omwegi nago tiyalifa, wazira ekiyakobere kyababaire kiti, "Singa owentaka nti asigale mwomi paka owenaliira, ekyo kikukwataku?"

²⁴ Oyo nago niiye omwegi akakasa ebintu ebyo, era niiye eyabiwandiikire. Kale tumaite tuti ebiyawandiikire ebyo bituuce.

Ebimaliirirya

²⁵ OYesu yakolere ebintu ebindi bingi. Era singa buli kimo bakiwandiikire, nseega nti waire

kyalo kyonakyona tikyandituukiremu ebitabo
ebibandibaire bawandiikire.

Endagaano Empyaka Omu Lugwere
Gwere: Endagaano Empyaka Omu Lugwere (Bible)

copyright © 2019 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022

03698e2d-9c8d-5b1f-bc49-b0066e860180